

M304: Dietrichs Flucht (R)

0,2328a Welt ir dar zv stille dagen .
0,2328b so wil ich iv chvrzlich sagen .
0,2328c do der wolf her Dietrich
0,2328d gelebt het vil wunnechlich
0,2328e Driv iar vnt vunf hvndert iar
0,2328f daz ich iv sage daz ist war
0,2328g Do starp der ellenthafte man .
0,2328h nv hoeret als ich z vernomen han
0,2328i Er liez sinen svn vil wunnechlich
0,2328j der hiez hvgedietrich
0,2329 Do der gewohs z einem man
0,2330 do begynd er hie mit hebn an .
0,2331 Daz zvht vnd ere
0,2332 sin Ratgebe was so sere
0,2333 Er minte tvgent vnd zvht
0,2334 er was der nothaften zvoffvht .
0,2335 Der milte ein gelichiv wage
0,2336 ein trost aller siner mage
0,2337 Im en wart vber noch gebrast
0,2338 er was der rehten triwe ein ast
0,2339 Der zvht ein rehter adamant
0,2340 sin h'ze was also gewant
0,2341 Swaz iv von milte ist geseit
0,2342 von tvgende vnd von warheit
0,2343 Daz ist an allen orten blint .
0,2344 alle die nv gewesen sint
0,2345 Die hant mit milt so vil niht getan
0,2346 als hvgedietrich der eine man
0,2347 In sinen besten ziten .
0,2348 daz er begynde striten .
0,2349 Nach lobe der weise
0,2350 nach der minne breise .
0,2351 Do nam er von franchriche .
0,2352 ein kvneginne riche
0,2353 Div hiez vrow sigeminne
0,2354 als ich mich reht v'sinne .
0,2355 Daz ich iv sold nv wizzen lan .
0,2356 daz ist iv e . wol chvnt getan .

0,2357 Wie der herre hvgedietrich
0,2358 die kvneginne von franchrich
0,2359 Mit ovzerwelter manheit .
0,2360 in ir vaterland erstreit
0,2361 Waz arbeit er vmb si gewan .
0,2362 e . er si ze wibe nam .
0,2363 Do er si braht in Roemisch lant
0,2364 nv ist mir daz wol bechant
0,2365 an disem langem maere .
0,2366 wie lange er mit ir waere .
0,2367 Mit gvotem leben daz ist war .
0,2368 fvmfthalp hvndert iar .
0,2369 Do div zit ein ende nam .
0,2370 ich sag iv waz er kinde gewan .
0,2371 Niwan einigen svn .
0,2372 der wart so biderb vnd so frvm .
0,2373 Daz er vil eren beiagte
0,2374 div selde mit im tagte .
0,2375 nv lazze wir div maere wesen .
0,2376 Do hvgedietrich niht lang' moht genesen .
0,2377 O we do starp er leider
0,2378 do vnderwant sich beider .
0,2379 amelvnc der lande
0,2380 den man sit wol bechande .
0,2381 Nv sint die kvnege alle tot .
0,2382 amelvnc leit sit grozze not .
0,2383 Mit manigem vorlivgen .
0,2384 vns welle daz maer trivgen .
0,2385 Idoch betwanch er manich lant
0,2386 daz ist genvegen wol erchant .
0,2387 Der riche kvnich amelvnc .
0,2388 der wart der tvgende vrsprvnc .
0,2389 Mit triwen vnd mit staete .
0,2390 wie manige tvgende er haete .
0,2391 Ez n gelebten iene bi ir tagen .
0,2392 als wir daz bvoch horen sagen .
0,2393 Nie so rehte brislich
0,2394 als amelvnc der kvnich rich
0,2395 Nv wil ich ivch wizzen lan .
0,2396 als ich fver war v'nomen han .
0,2397 Von welhem lande er nam ein weip .
0,2398 da mit sin tvgenthafter liep .
0,2399 Maniger eren teil gewan .
0,2400 wol ich iv daz bescheiden chan .
0,2401 Div was von Kerling geborn .
0,2402 nv svlt ir haben niht fver zorn .
0,2403 Daz ich ivch berihtet han .
0,2404 wie ez enneher ist ergan

0,2405 amelvnch der riche
0,2406 der gewan sicherliche
0,2407 Drie svne wol getan .
0,2408 der namen ich iv wol nennen kan .
0,2409 Der altest der hiez diether
0,2410 nv sag ich iv ane wer
0,2411 Der ander d' hiez Ermrich
0,2412 herre got nv chlag ich
0,2413 Daz er ie einen tach genas
0,2414 wand er der vngetriwiste was
0,2415 Der ie von mvoter wart geborn .
0,2416 von im wart manich man v'lorn .
0,2417 Der dritte amelvnges svn .
0,2418 nv hoeret dise maere nvon .
0,2419 Der hiez der kvnich Dietmar .
0,2420 do amelvnch siniv iar .
0,2421 Wol lebt vnz an sinen lesten tach
0,2422 nv svlt ir horen wes er do phlach
0,2423 Do rieten im mag vnd man .
0,2424 "herre ir svlt daz niht lan .
0,2425 Od ir teilet iwer lant
0,2426 vnder ivriv kint alzehant ."
0,2427 Do volgt er ir aller rat .
0,2428 er teilte div lant an der stat .
0,2429 Do gab er Ermriche .
0,2430 pvllen gewaltichliche .
0,2431 Galaber vnd wernhers marche
0,2432 wernher der helt starche
0,2433 Der enphie daz h'zentvom vnd daz lant .
0,2434 von des vngetriwe Ermriches hant .
0,2435 Daz maer ich war mache .
0,2436 do gab er Brisache .
0,2437 Vnd Bern daz lant .
0,2438 diether dem wigant .
0,2439 Do gab er dem kvnige dietmar .
0,2440 Lamparten allez gar .
0,2441 Romisch erde vnd vsterich
0,2442 daz ez im dient gewaltichlich
0,2443 Frivl sleht vberal .
0,2444 vnd dar zvo daz intal .
0,2445 amelvnch der starp da mit .
0,2446 ze hoeren ich ivch alle bit
0,2447 Waz ich iv nv sagen wil .
0,2448 dise herren habent landes vil
0,2449 Dar zvo gvot vnde lip .
0,2450 Si namen alle drie wip .
0,2451 Vnd gewonnen bi den wiben kint .
0,2452 di arbeit liten sint .

0,2453 Nv wil ich iv tihten .
0,2454 vnd der maer sleht berichten .
0,2455 Waz islicher kint gewan .
0,2456 daz wil ich ivch wizzen lan .
0,2457 Ez gewan der kvnich Ermrich .
0,2458 einen svn der hiez Friderich .
0,2459 Den er sit v'sande .
0,2460 hin ze der wilzen lande .
0,2461 Dar an man sin vntriwe sach .
0,2462 nv seht da er sin triwe brach .
0,2463 an sinem lieuem kinde .
0,2464 an manigem maer ich daz vinde
0,2465 Daz bei nimannes tagen .
0,2466 vngetriwer lip nie wart getragen
0,2467 Diether der riche
0,2468 der gewan siche'liche
0,2469 drie svne wol getan
0,2470 den Ermrich sit benam
0,2471 Daz lebn do er si vie .
0,2472 vnd si ane schvlde hie .
0,2473 Dietmar der tvgenthaft .
0,2474 der lebt in reiner blvend' chraft .
0,2475 Fvmfzehen iar vollechlich .
0,2476 vnd nam ein kvneginne rich .
0,2477 Eines kvniges tohter .
0,2478 deste baz moht er
0,2479 Gelebn nach sinem mvote
0,2480 Dietmar der gvote .
0,2481 Gewan bi der selben vrowe- kint .
0,2482 die wuerden biderb vnde kvene sint .
0,2483 Wer der eine were
0,2484 daz ist der Bernere .
0,2485 Der mit manig' manheit .
0,2486 ellev div wunder hat beieit .
0,2487 da von man singet vnde seit .
0,2488 wand er leit michel arbeit .
0,2489 Dietmar vnde Ermrich .
0,2490 die zvgen bede vngelich
0,2491 Ermrich der wart charch
0,2492 Dietmar vor eren nie ne barch
0,2493 Er was milt vnd tvgenthaft .
0,2494 got fvegt im gvotes riche chraft .
0,2495 Doch sagt vns ein maere .
0,2496 swie milte dietmar waere
0,2497 Idoch bowete er Berne .
0,2498 vnde . was da alle zit vil gerne .
0,2499 Vnz an sines endes zil .
0,2500 er gewan hoher eren vil .

0,2501 Er was ein vorhtsam man .
0,2502 des was im sleht vndertan .
0,2503 Romisch lant vnd romisch marche .
0,2504 Dietmar der was so starche .
0,2505 Daz im bi sinen ziten .
0,2506 nie kvnich torst wider Riten .
0,2507 In den eren lebte Dietmar .
0,2508 vierzech iar vnd driv hvndert iar .
0,2509 do chom der dem nieman vor gehalten mach .
0,2510 der tot vnd der leste tach .
0,2511 O we do starp er leider
0,2512 do v'zech sich dietmar ir beider .
0,2513 Des leibes vnd des gvetes
0,2514 der vrvnt vnd hohes mvetes .
0,2515 Do het er niwan zewei kint .
0,2516 die liten arbeite sint .
0,2517 daz was diether vnd dietrich .
0,2518 die sit vertraip chvnich Ermrich
0,2519 nv laze wir di maere stan .
0,2520 vnd hebn hie mit wider an .
0,2521 Do der kvnich dietmar starp .
0,2522 Romisch lant nach im v'darp .
0,2523 Daz iz wart allez oede
0,2524 an groezer richeit bloede
0,2525 Daz beiz ich wol bescheidenlich
0,2526 daz geschach von dem kvnich Ermrich
0,2527 Do dietmar den tot dolde
0,2528 als er doch sterben wolde .
0,2529 do bevalch er Ermriche .
0,2530 siniv kint getrivliche .
0,2531 O we daz iz ie geschach .
0,2532 wand er sine triwe sit an in brach .
0,2533 Nv ist der kvnich dietmar tot .
0,2534 nv hebt sich iamer vnde not .
0,2535 In al Romisch lande
0,2536 mit westen vnd mit brande .
0,2537 Dietheren vnd Dietrich
0,2538 die zoh ein herzoge rich
0,2539 Hildebrant der alte
0,2540 der chvene vnd der balde
0,2541 Der sit not arebeit .
0,2542 dvrch sine liebe herren leit
0,2543 Nv ist iv wol chvnt getan .
0,2544 wie Ermrich griffet an
0,2545 vntriwe vnde vbermvot
0,2546 daz leider selten wirt gvot .
0,2547 Nv horet reht wie ez ergie .
0,2548 Ermrich die harlvnge vie .

0,2549 Wie er des gedahte
0,2550 daz er siv zvo sich brahte .
0,2551 Da er in tach het gegeben .
0,2552 da schiet er si von dem leben .
0,2553 Vnd zoch sich zvo ir lande .
0,2554 o we der grozzen schande .
0,2555 Daz die got vertragen hat .
0,2556 ez was div groste missetat .
0,2557 Div vof der erde ie geschach .
0,2558 got daz sit allez rach
0,2559 an sinem gvot an sinem leben .
0,2560 er nam im swaz er m het geben .
0,2561 Vnd rach den maeinraeten zorn .
0,2562 der lip der wart hie verlorn .
0,2563 Nv ist div sele geselle
0,2564 des tyeuels in der helle
0,2565 Do man die harlvngen
0,2566 von ir leben het gedrvngen .
0,2567 Do riet sybech vnd Ribstein .
0,2568 “des ist zwivel dehein .
0,2569 Edel kvnich Ermrich .
0,2570 maht v dinen veter Dietrich .
0,2571 Von dem leben gedringen .
0,2572 so habe den gedingen
0,2573 Mit swelhem satze daz geschiht
0,2574 so chan dir gewerren niht
0,2575 Hinfver immer mere
0,2576 so has tv gvot vnd ere
0,2577 Me danne dehein din genoz .
0,2578 so wirt din gewalt groz
0,2579 Daz sich in den richen
0,2580 niemen getar zvo dir gelichen .”
0,2581 DER chvnich Sybchen an sach .
0,2582 nv svlt ir horen wie er sprach .
0,2583 “Nv wol mich daz ich dich han .
0,2584 dv redest als ein getriwer man .
0,2585 Der ninder vnstete hat .
0,2586 nv gib mir Sybech den rat .
0,2587 Da mit ich beherte romisch lant .
0,2588 dietrich von Bern . hat an der hant .
0,2589 an aller slahte rede den tot .
0,2590 od ich bring en in solhe not .
0,2591 Daz er mir rovmen mvoz daz lant .”
0,2592 do sprach Sybech alzehant
0,2593 “Ich getvon iv herre wol den rat .
0,2594 der im an sin leben gat .
0,2595 Ich sag iv h’re wie ir vart .
0,2596 daz daz nimmer wiert bewart .

0,2597 Ir bringet Dietrich swar ir welt .”
0,2598 der kvnich sprach “o we welich ein helt
0,2599 Dv Sybech ze manigen eren bist
0,2600 got gvnne mir din vil lange vrist
0,2601 Nv rat an wie ez mvge ergan .”
0,2602 “herre daz wil ich ivch wizzen lan .
0,2603 Welt ir z horen gerne
0,2604 nv gebiet dem von Berne .
0,2605 Vnd heizet dem iw’n chv-mer chlagen
0,2606 den ir da sendet den bitet sagen .
0,2607 Vnd ir welt varn vber mer .
0,2608 got dienen mit einem her .
0,2609 Dem hern grab helfen voz d’ not .
0,2610 vmb der harlvnge tot .
0,2611 Den ir schaden habt getan .
0,2612 vnd in ir leben habt gewonnen an .
0,2613 daz welt ir gerne bvezzen
0,2614 ir getrowet got wol dem svezzen .
0,2615 Daz ir als lange noch gelebt .
0,2616 vntz ir in bvezze gegeben .
0,2617 Vnd enbietet im mere .
0,2618 iwer lant vnd iwer ere .
0,2619 Welt ir im geben in sine phlege .
0,2620 vnd welt ir varn after wege .
0,2621 Vnd heizet den boten me sagen .
0,2622 vnd bitet in daz niht v’dagen .
0,2623 aller iwer riche .
0,2624 der mvge sicherliche .
0,2625 Nieman baz gepflegen danne er
0,2626 vnd heizet in chomen da mit her
0,2627 Nv seht . wie wol ivch daz frvmt .
0,2628 ich weiz wol daz er her chvmt
0,2629 als daz danne geschiht
0,2630 so beitet da mit langer niht
0,2631 Ir scheidet in von dem leben .
0,2632 so hat iv got den wunsch geben
0,2633 Daz aller iwer vordern lant
0,2634 wartent iwer eines hant .
0,2635 Ist aber daz daz niht geschiht .
0,2636 daz er zvz iv chvmet niht .
0,2637 So reit mit heren starche .
0,2638 in sin lant vnd in sin marche
0,2639 Vnd gewinnet im ere vnd gvot an .
0,2640 daz chan er nimmer vnderstan .”
0,2641 “Nv ratet mer” sprach Ermrich
0,2642 “ob min veter Dietrich .
0,2643 ze wer sich sezet gegen mir”
0,2644 Sybech sprach “so habt ir

0,2645 So manigen werden volchdegen .
0,2646 welt ir ivch anders bewegen .
0,2647 Daz ir im mage vnd man .
0,2648 allez daz betwinget an
0,2649 Lant gvot vnd gelt .
0,2650 ir machet oede siniv velt .”
0,2651 Do sprach der kvnich Ermrich
0,2652 “daz tvon ich vil gewislich
0,2653 Nv wil ich dich biten mere .
0,2654 Sybech getriwer reche here .
0,2655 Wa wir einen boten dar .
0,2656 nv gewinnen des nim war .”
0,2657 Do sprach der vngetriwe man .
0,2658 “daz sol chvrzlich ergan .
0,2659 Fvr war wil ich raten daz .
0,2660 din bote chan nieman wesen baz .
0,2661 Denne von ankowe Randolt
0,2662 der ist dir mit triwen holt”
0,2663 Randolt der ziere .
0,2664 der wart gewonnen schiere
0,2665 Do in Ermrich an sach .
0,2666 nv vernemt wie er sprach .
0,2667 “Randolt lieber man min .
0,2668 dv solt min bot ze bern sin .
0,2669 ze minem veter Dietrich”
0,2670 Sybech sag im heimlich
0,2671 disen vngetriwen rat .
0,2672 den man zesamne gebrowen hat .
0,2673 Randolt sich schiere . vereinte .
0,2674 er weste wol waz man meinte .
0,2675 Dirre vngetriwer smerze .
0,2676 der gie im in sin herze .
0,2677 Vnd betrvebt siniv ovgen .
0,2678 er begvnde trahten tovgen .
0,2679 Von disem starchem maere .
0,2680 wie er den Bernere
0,2681 Bewart vnd behvot .
0,2682 daz ez im choem ze gvot .
0,2683 Nv horet wie vns daz bvot las .
0,2684 do Randolt gevertiget was .
0,2685 Da hin gegen Berne .
0,2686 der kvnich sprach “nv wirp gerne .
0,2687 Getrevlich die botschaft
0,2688 ich gib dir gvotes riche chraft .”
0,2689 “Ich getvon im so daz ez da wirt .”
0,2690 sprach Randolt “dv bist niht v’irt .
0,2691 an allen minen reisen .
0,2692 ich bringe dir die weisen .

0,2693 Daz solt dv kvnich vof mir han .”
0,2694 der bote schiet hie mit dan .
0,2695 Der reise er slehtes sich bewach .
0,2696 nv horet waz triwen er phlach
0,2697 Mit maniger riwe vof dem wege .
0,2698 vof der straz vnd vber stege .
0,2699 Trvchenden siniv ovgen nie .
0,2700 manigen sovft den er lie .
0,2701 Hin ze den ovgen vnd von grvnde .
0,2702 got er antwurten begvnde .
0,2703 Gaenlich vnde gerne .
0,2704 die herren bede von Berne .
0,2705 Er chlagte ane maze .
0,2706 disen mort vof der straze .
0,2707 Vntz daz er chom ze rabn .
0,2708 ein herzoge der hiez Sabn .
0,2709 Der was herre vber die stat
0,2710 als man mir gesaget hat .
0,2711 Nv wart Randolten kvnt .
0,2712 vnd vragt ovch an der stvnt .
0,2713 Wa er Saben vunde .
0,2714 man zeigt im bi der stvnde
0,2715 Den werden rechen ziere .
0,2716 Randolt der vant ir schiere .
0,2717 Ererbeizt vor dem palas .
0,2718 In den ziten chomen was .
0,2719 Saben vnde Friderich .
0,2720 bede waren si fursten rich .
0,2721 Vnd heten levte vnde lant .
0,2722 von des Berners hant .
0,2723 Si begvnden vaste gahen .
0,2724 do si Randolten sahen .
0,2725 Do wart er wol enphangen .
0,2726 “nv lat ivch niht belangen .
0,2727 Daz ich iv sage die maere .”
0,2728 sprach Randolt der gewaere .
0,2729 “Ich bin ein bote” so sprach er .
0,2730 “vnd riete von Ermriche- her .
0,2731 vnd wil gahen gegen Berne .
0,2732 nv sagt ich iv gerne .
0,2733 vil heimlichiv maere .
0,2734 iwer herre der Bernaere
0,2735 In gvoten triwen verraten ist
0,2736 des bin ich bote an dirre vrist .
0,2737 Daz tvon ich iv werliche chvnt
0,2738 swer im nv gynne an dirre stvnt
0,2739 Gvotes vnde triwen .
0,2740 die lazzen sich daz riwen .

0,2741 Ich wil in z selb wizzen lan
0,2742 ich han z iv vmb daz kvnt getan
0,2743 Daz ir ivch edele degne .
0,2744 rihtet da enegne .
0,2745 Daz ir ivrem herren .
0,2746 Helfet wenden solhen werren .”
0,2747 Da mit der bote danne streich .
0,2748 der reise er nie tach entweich
0,2749 Vnz er ze Berne reit in die stat .
0,2750 als man mir gesaget hat
0,2751 Er hvop sich da mit schiere .
0,2752 Randolt der ziere .
0,2753 In den hof vof den sal .
0,2754 da het michelen schal .
0,2755 Der ivnge kvnich von Berne .
0,2756 der sach den boten gerne .
0,2757 “Got willechomen Randolt .
0,2758 von rechte so bin ich dir holt”
0,2759 Sprach der reche hildebrant
0,2760 “sag an maerer wigant .
0,2761 Weist iht maer od wie gehabs tv dich .”
0,2762 “der maere bringet daz bin ich”
0,2763 Hie mit bat man vez gan .
0,2764 die man da inne niht wolde lan
0,2765 Randolt der sweich niht mer
0,2766 er sprach “dir enbivtet her .
0,2767 Ermrich der veter din .
0,2768 daz hab vof den triwen min .
0,2769 Dar zvo so dv schierste maht
0,2770 daz hab eben in diner aht .
0,2771 Daz dv zv im ritest
0,2772 vnd hvet daz dv iht bitest
0,2773 Fvr den tach morgen .
0,2774 ich sag dir vnverborgen .
0,2775 Mit swelhem ende . dv chvmest dar
0,2776 daz hab gewisse fvr war .
0,2777 So has tv gvot vnd lip verlorn .
0,2778 bezzer ist div reise verborn
0,2779 Denne ob dv lideest den tot
0,2780 so mvesten immer haben not .
0,2781 Swaz der dinen livte sint
0,2782 nv beleibe hie dietmares kint .
0,2783 Nv han ich dir di warheit
0,2784 rehte vnd ebene geseit
0,2785 Nv sende fvrste stanche .
0,2786 alvmb vof dine marche .
0,2787 Besezze dine veste
0,2788 daz ist dir daz beste

0,2789 Nv has tv wol v'nomen an dirre vrist
0,2790 wie dir din lip verraten ist
0,2791 Da mit mvoz dich got bewarn .
0,2792 ich wil mit dinen hvlden varn .
0,2793 Heim vof mine marche
0,2794 hab vof mir" sprach der starche
0,2795 "Daz ich dir bei wil gestan
0,2796 vnd slehtes herre dvrch dich lan
0,2797 Man gvot vnde wip .
0,2798 dvrch dich wag ich gvot vnd lip ."
0,2799 Da mit der bote danne streich .
0,2800 der reise er nie zit entweich .
0,2801 Vnz er Ermrichen vant .
0,2802 er hvob vf vnd sait zehant .
0,2803 Des doch ze Berne nie wart gedaht .
0,2804 "herr er wirt niht fvre braht .
0,2805 Dar nach schaft swie ir welt .
0,2806 div sippe div ist voz gezelt .
0,2807 zwischen ev vnde sin .
0,2808 er chvmt her niht herre min ."
0,2809 Nv wurden div maere schier chvnt
0,2810 in des hvp sich bi der stvnt .
0,2811 Der chvene Randolt von dan .
0,2812 er wolde Ermrich niht gestan .
0,2813 Do der vngetriwe wart gewar .
0,2814 daz der von Berne wart so gar
0,2815 Gewarnet dirre maere
0,2816 do wart im harte swere
0,2817 Do gebot er eine herevart .
0,2818 daz nie dehein groezorer wart
0,2819 Vof romischer erde .
0,2820 vil manigen rekchen werde .
0,2821 Die gewan Ermrich .
0,2822 ze helfe vof dietrich .
0,2823 nv hebt sich not vnd vngemach .
0,2824 dvrch vntriwe daz geschach .
0,2825 Daz ist div erste swaere .
0,2826 da mit der Bernaere .
0,2827 Des ersten gvnde hebn an
0,2828 . e . er gewohs z einem man
0,2829 Ermrich daz golt rot .
0,2830 allen den recken bot
0,2831 vnd swer ez nemen wolde
0,2832 den richte er mit solde .
0,2833 des wart vil michel sin her .
0,2834 nv rait er sleht ane wer .
0,2835 Da er beiagen wolde rvom .
0,2836 ze spolit in daz herzentvom .

0,2837 Da tet er schaden starche
0,2838 ze ankowe vof der marche
0,2839 Da wost er rivt vnd lant
0,2840 er hiez werfen an den brant
0,2841 Do brvof er not vnd vngemach
0,2842 daz gestvont vnlange dar nach
0,2843 vnz man seit div maere .
0,2844 die vnpillichen swaere .
0,2845 Die chomen in z lant vberal .
0,2846 do der schade so wite erschäl .
0,2847 Den fremden vnd den gesten .
0,2848 den hohen vnd den besten .
0,2849 Den behagt iz allez niht wol .
0,2850 sit ich iv die warheit sagen sol .
0,2851 die vntriwe die Ermrich .
0,2852 begie an hern Dietrich
0,2853 Vmb dise groze geschicht
0,2854 dar vof aht Ermrich niht
0,2855 Er het sih s bedenthalt bewegen .
0,2856 er hiez daz lant ode legen .
0,2857 Mit rovb vnd mit brande .
0,2858 nieman in des wande
0,2859 Romisch lant allez er fver sich nam .
0,2860 dar vmb het er deheine scham
0,2861 Er brante vnz an maylan .
0,2862 er tote wip vnde man
0,2863 Der mort was im gar ein wint .
0,2864 daz rach got allez an im sint .
0,2865 Not vnde waffen chlagen .
0,2866 daz geschach allez bi den tagen .
0,2867 Ermrich des niht verdroz .
0,2868 ditze vnbilde groz .
0,2869 Vnd ovch div vngebaere
0,2870 daz wart ein gengez maere .
0,2871 Von armen vnd von richen .
0,2872 dem herren dietrichen .
0,2873 het dannoch niemen geseit
0,2874 den mort vnd daz herzen leit
0,2875 Nv gevriesch der herzoge Saben
0,2876 div maere hin ze Raben
0,2877 Ez lege Ermrich vnd manich man .
0,2878 vor der stat ze Meilan .
0,2879 als ez ovch leider war was .
0,2880 niemen vor im genas .
0,2881 Nv ist mir daz fvr war geseit .
0,2882 Ermrich swor einen eit .
0,2883 Daz er nimmer wold . vof gehan .
0,2884 od im wuord Bern vndertan .

0,2885 Nv habt ir div maer wol v'nomen
 0,2886 wie gewaltichlich ist chomen .
 0,2887 Ermrich in Romisch lant .
 0,2888 hie mit fver er sa zehant
 0,2889 Von Meilan gegen Raben .
 0,2890 der herzoge Saben .
 0,2891 Der gie ze rate vnd sine man .
 0,2892 die er do mohte bi im han .
 0,2893 Er sprach "weiz ab iemen endelich
 0,2894 ob min herre dietrich .
 0,2895 Wizze disev maere
 0,2896 der nv gvot waere .
 0,2897 Der dvrch vns alle gerne
 0,2898 striche gegen Berne
 0,2899 Vnd da chvnt taete
 0,2900 dise meinraete .
 0,2901 Die der chvnich Ermrich .
 0,2902 an vns tvot vngetrivlich"
 0,2903 "daz wil ich sein" sprach volchnant
 0,2904 "ich wil gen Berne alzehant"
 0,2905 Dem helde vil v'svnnen .
 0,2906 balde wart gewonnen .
 0,2907 Ein meidem den man ledich zoch .
 0,2908 dar vof er iagte vnde vloch
 0,2909 Do der rekche wart bereit
 0,2910 hie mit er niht lenger beit
 0,2911 Sinen meidem nam er in die hant .
 0,2912 da mit dvrchstreich er daz lant .
 0,2913 Mit vil grozen sorgen .
 0,2914 vnz an den driten morgen
 0,2915 Er chom ein wenich vor dem tage .
 0,2916 nv merchet reht waz ich iv sage .
 0,2917 Fvr die stat ze Berne .
 0,2918 nv svlt ir horen gerne
 0,2919 Wie der reke lobaere
 0,2920 chvnte disev maere
 0,2921 Ein deggen der hiez Volchnant
 0,2922 der chom ze Bern fvr gerant
 0,2923 "Nv wol vof herre dietrich
 0,2924 vil sere riwes tv mich ."
 0,2924a Hie hebt sich der erste streit .
 0,2924b Ein deggen der hiez Volchnant .
 0,2924c der chom ze Bern fvr gerant
 0,2924d "Nv wol vof herre Dietrich .
 0,2924e vil sere riwes tv mich .
 0,2925 dir hant di Ermriches man .
 0,2926 so vil ze leide getan .
 0,2927 Si ligen vof diner marche

0,2928 die edelen brennent starche
0,2929 Nv ledige wip vnd chint
0,2930 die mit grozen noten sint .
0,2930a Nv wer dich degen here .
0,2930b ich ne warne diech ni mere
0,2931 Ermrich let niemen genesen .
0,2932 swer an dir herre wolde wesen .
0,2933 Dem tvot er vil ze leide
0,2934 fvr war ich dir z bescheide
0,2935 Nv wol vof degen here
0,2936 ich ne warne dich ni mere”
0,2937 Hin vmb daz er gesagte .
0,2938 von himel ez schone tagte .
0,2939 Do was ovch chomen Hildebrant
0,2940 der vant den degen Volchnant
0,2941 Vor der bvorch ze Berne .
0,2942 er sach den recken gerne .
0,2943 Er nam den ellenthaften man .
0,2944 er weiste in balde mit im dan .
0,2945 Fvr den Bernaere
0,2946 er sagt im div maere
0,2947 Von Ermriches reise
0,2948 den mort vnd die vreise
0,2949 den Ermrich tet in dem lande
0,2950 mit ravb vnd ovch mit brande .
0,2951 “Ich wil dir sagen waz dv tvo
0,2952 nv grife baldichlichen zvo
0,2953 Sende vof dine marche
0,2954 vnd bitte die recken starche
0,2955 daz si gedenchen dar an .
0,2956 ob in din vater ie liep hat getan .
0,2957 Daz si dir chomen schiere .”
0,2958 “ich weiz wol” sprach der ziere
0,2959 “Dv maht wol edele recken han
0,2960 wellent si dir gerne bi gestan .”
0,2961 “Mit triwen” so sprach hildebrant
0,2962 “nv sag an herre Volchnant
0,2963 Has tv daz groz volch gesehen
0,2964 des hort ich dich gerne iehen
0,2965 Wie vil mach Ermrich levte han
0,2966 daz solt dv mich wizen lan .”
0,2967 “daz weiz ich wol” sprach Volchnant
0,2968 “ich sag dir herre Hildebrant
0,2969 Ermrich der chvnich here
0,2970 ahzech tvosent vnd dannoch mere .
0,2971 Mach Ermrich vil wol han .
0,2972 als ich mich versinnen chan .”
0,2973 Leit wart dem Bernaere .

0,2974 Hildebrant der maere .
0,2975 der troste sinen herren .
0,2976 “vmbe disen grozen werren .
0,2977 Svlt ir chvnich niht v’zagen .
0,2978 ich wil iv ander maer sagen .
0,2979 E . ez noch hivt werde naht .
0,2980 wir gewinnen etlichen maht
0,2981 Ermrich ze leide
0,2982 . e . er hinnen scheide .
0,2983 Er gelaet vns etlich phant .
0,2984 da mit vns erbe vnde lant
0,2985 Wirt leiht vergolten”
0,2986 der rat wart niht bescholten
0,2987 In der zit do daz geschach
0,2988 zv der stat man riten sach
0,2989 Vil manige schar herlich
0,2990 do wart dem herren dietrich
0,2991 Gesagt niwev maere
0,2992 daz ein her chomen waere
0,2993 Fvr die stat ze Berne .
0,2994 daz hort er vil vngerne .
0,2995 Wand im het nieme- chvnt getan .
0,2996 daz ez waeren sine man
0,2997 Man hiez bereiten vof die wer
0,2998 armbstschvzzen gegen dem her .
0,2999 In der zit chom helmschart
0,3000 vnd der stanche Wolfhart
0,3001 Mit vil manlichen sitten .
0,3002 ze Bern vof den hof geriten .
0,3003 vnd sagt dem Bermaere
0,3004 div starchen . niwen maere
0,3005 “Ez sint chomen iwer man
0,3006 fvr di stat vf den plan
0,3007 Hvonolt vnde Sigebant
0,3008 Sindolt vnd Volchnant
0,3009 Ekkebart vnde Nere
0,3010 alphart ein degen here
0,3011 Vnd der herzoge Saben
0,3012 vnd Friderich von Raben .
0,3013 Ivbart von Latran .
0,3014 Starher vnd elsan
0,3015 Stvotfvhs von Reine
0,3016 von Metzen ortwine
0,3017 Vnd von Pole Perchtram .
0,3018 die habent braht zwei tovsent man .
0,3019 Nvtra herre dietrich
0,3020 nv enphahe die herren loblich
0,3021 Ich weiz daz wol ez ist dir gvot

0,3022 nv rihte dar nach dinen mvot
0,3023 Vnd erbivt ez wol den edelen degn .
0,3024 si habent sich dvrch dich bewegn
0,3025 alles des in geschehen chan .”
0,3026 div rede wart hie mit verlan
0,3027 Vro wart der herre dietrich
0,3028 er nam die recken alle ze sich
0,3029 als er enphahen wolde .
0,3030 die recken als er solde .
0,3031 Gebiten wart da niht mer .
0,3032 von Bern der fvrste her
0,3033 Reit voz der stat ze Berne
0,3034 da er di helde gerne .
0,3035 Lieplich enphahen wolde
0,3036 ze reht als er solde
0,3037 die werden Dietriches man
0,3038 da von er vrevde gewan .
0,3039 Die chvonen vnd die starchen .
0,3040 die stvonden von den marchen .
0,3041 Her dietrich lachende zv in sprach .
0,3042 do er si dort erbeizen sach .
0,3043 “Nv sit got willechomen vnd mir
0,3044 stolze recken ich wen daz ir
0,3045 Welt nv retten miniv lant .”
0,3046 mit gemeinem mvnde sprachen si zehant
0,3047 “daz wirt willechlich getan .
0,3048 welt ir z selbe grifen an .
0,3049 Wir helfen rechen iriv leit
0,3050 wir sin iv alles des bereit
0,3051 Vnd ze wenden ivres landes not .
0,3052 od wir geligen bi iv tot
0,3053 dar vmbe zweivelt niht ze war
0,3054 swanne ir welt so reitet dar”
0,3055 Die recken bat her dietrich
0,3056 mitsamt im gen getrevlich
0,3057 vof den herlichen palas
0,3058 daz ezzen nv bereitet was
0,3059 vber die tische si do sazen
0,3060 ir mvede si vergazen .
0,3061 Ir wart vil herlich gepflegen
0,3062 Wolfhart der stanche degen .
0,3063 Riet vast vof die reise
0,3064 ze rechen die vreise .
0,3065 Die Ermrich vnd sine man
0,3066 im ze leide heten getan .
0,3067 als man die tische gehvp
0,3068 so man nach ezzen dike tvot
0,3069 do bat der Bernaere .

0,3070 die chvnen recken maere
0,3071 allensamt bereit sein
0,3072 si taten im mit triwen schein
0,3073 Ir dienest schon vberal
0,3074 div kastellan fvr den sal .
0,3075 Waren mit einander chomen
0,3076 die man ze r reis haet voz genomen
0,3077 ze rechen waren si bereit
0,3078 nv was vber al die stat geseit .
0,3079 den ivngen vnd den alden
0,3080 dem tvmben vnd den balden
0,3081 Wie der herre dietrich .
0,3082 den vngetriwen Ermrich .
0,3083 Mit stvrmen vnd mit striten
0,3084 des tages wold an riten
0,3085 do man div maer gevreischt hat
0,3086 do giengen al die vrowen von d' stat
0,3087 Mit chleglichem leide
0,3088 als ich iv nv bescheide .
0,3089 Fvr des hoves porten .
0,3090 mit gelichen Worten .
0,3091 Islichiv sprechen began .
0,3092 wider ir chint vnd zv ir man .
0,3093 "wem welt ir vns lazen"
0,3094 mit weinen solich vnmazen
0,3095 wart da sere getan .
0,3096 beidiv von vrowen vnd von man .
0,3097 vof stvot selbe her dietrich .
0,3098 "ist iemen hie den ich
0,3099 Mit deheinem leide beswart han .
0,3100 der rvoch daz hvt dvrch got lan .
0,3101 Ich en weiz niht" sprach der recke her
0,3102 "ob ir mich beschowet imm' mer"
0,3103 hie wart ein weinene vn- ein chlag
0,3104 si sprachen als ich ev wil sagen .
0,3105 "Ir habt vns leides niht getan .
0,3106 got mvez ivch in sinem vride han ."
0,3107 do wart da ze stvnde .
0,3108 von maniger vrowen mvnde
0,3109 Der segen vlizechlich getan .
0,3110 die edelen dietriches man .
0,3111 Hie mit langer niht en biten
0,3112 mit vnverzagelichen siten .
0,3113 Rovmten si do Berne .
0,3114 si wolten rechen gerne .
0,3115 Ir schaden vnd ir herzen leit
0,3116 si riten dan als man seit
0,3117 Ez was nv nahen bi der naht

0,3118 si baten got daz er in maht
0,3119 Gaebe zv ir swaere .
0,3120 nv horet diser maere .
0,3121 div ich iv nv tvon chvnt .
0,3122 nv ahte wir an dirre stvnt
0,3123 Waz her dietrich recken mohte han
0,3124 da mit er Ermrich wolt bestan .
0,3125 Daz wart gahtet vof den wegen .
0,3126 sehs recken min dan tovsent degn .
0,3127 Der reise gahten si vaste
0,3128 die mile vnd die raste
0,3129 Begvnden si gahen .
0,3130 vnz daz si chomen so nahen
0,3131 daz si daz Ermriches her
0,3132 sahen ligen mit starcher wer .
0,3133 Nv was ez chomen an daz zil .
0,3134 als ich ivch horen lazen wil .
0,3135 vber den ersten slaf od baz
0,3136 si begvnden alle trachten daz .
0,3137 wie si varen wolden
0,3138 od hie mit tvon solden .
0,3139 Do sprach der recke Hildebrant .
0,3140 “ich rat iv chvnich von romisch lant
0,3141 daz ir daz iht wendet
0,3142 vil wundernbalde ir sendet
0,3143 Iwer boten al da hin .
0,3144 der in der maze habe sin .
0,3145 der livt chvnne ahten .
0,3146 vnd ovch daz mvge betrahten
0,3147 Wa wir s mit strite rennen an .”
0,3148 “daz wirt gerne getan .”
0,3149 Sprach der herre dietrich
0,3150 “nv svlt ir helde loblich
0,3151 ahten mit vil rechter Kver
0,3152 wen wir ze boten senden fver”
0,3153 Do sprach mit gewalte .
0,3154 hildebrant der alte
0,3155 “Ich rat iv liber herre min
0,3156 volchnant vnd Erewin
0,3157 daz drite daz si Helmschart .
0,3158 daz ir die sendet an die vart
0,3159 Selb wil ich daz vierde sin”
0,3160 “nv tvo liber man min .”
0,3161 Die edelen recken viere
0,3162 die namen harte schiere .
0,3163 Die gvoten meidem an die hant
0,3164 Hilpranden dem was wol bechant .
0,3165 die stige vnd ovch die straze

0,3166 si riten in der maze .
0,3167 zv dem her so nahen
0,3168 daz si ir gelegenheit wol sahen .
0,3169 Michel was des heres schal
0,3170 si vmbedrapten daz wal .
0,3171 Vnd ovch daz her allez gar
0,3172 si ersicherten reht fver war .
0,3173 wa si die stat fvnden ..
0,3174 daz si bi den stvnden .
0,5691 eRmriches boten gahten sere
0,5692 si v'miten daz niht mere
0,5693 Si strichen vast vber lant .
0,5694 si taten die h'vart bechant
0,5695 Vrevnden vnde gesten .
0,5696 si strichen von vesten ze vesten .
0,5697 Vnd hiezen si chomen in chvrzer stvnt
0,5698 vnd taten endelichen chvnt
0,5699 Wa si Ermrichen .
0,5700 fvnden sicherlichen .
0,5701 Hie mit disen sachen .
0,5702 begvnden sich ovf machen .
0,5703 arm vnd rich vber al daz lant
0,5704 daz her daz saich alzehant
0,5705 Reht gegen Prissan .
0,5706 da in het hin chvnt getan
0,5707 der maehtich chvnich Ermrich
0,5708 daz her daz wart eislich
0,5709 vnd ovch div groze hervart
0,5710 daz nie decheine grozer wart
0,5711 vf romischer erde
0,5712 sich samten da helde w'de
0,5713 Nv horet wie vns daz bvoch las
0,5714 di weil div Samenvnge was
0,5715 Vor der stat ze Brissan
0,5716 do sazt sich wider Meilan
0,5717 Vnd cherten an den von B'ne
0,5718 nv svlt ir horen g'ne
0,5719 wer der stat gewaltich was
0,5720 ein herzoge der hiez Tydas
0,5721 dem was div stat vndertan .
0,5722 d' moht wol mit vollen han .
0,5723 Towsent rechken ode baz
0,5724 rehte svlt ir wizen daz .
0,5725 Er was ein hohgevrivnt' man .
0,5726 die helde ich wol genennen chan .
0,5727 Die bi im waren in der stat
0,5728 als man mir gesaget hat
0,5729 da was der starche Saben

0,5730 vnd friderich von Raben .
0,5731 Berhther vnde Starchan
0,5732 von osterfranchen Herman
0,5733 Vnd manich edeler helt balt .
0,5734 die ellens heten gewalt .
0,5735 Die man nimm' sach v'zagen .
0,5736 die taten manheit bi ir tagen .
0,5737 Nv get ez an ein ahten
0,5738 ich sag iv daz betrachten .
0,5739 Daz Tydas tet vnd sine man .
0,5740 er sprach "ir held nv griffet wid' an
0,5741 vnd ratet hie zvo alle
0,5742 ob iz iv wol gevalle
0,5743 Daz hort ich von iv g'ne
0,5744 wen sende wir gegen B'ne
0,5745 zv mine- herren dietrich
0,5746 der im sage waerlich
0,5747 Daz wir an in cheret han .
0,5748 mit der stat ze Meilan .
0,5749 Vnd im sage endelichen gar
0,5750 welle er wir chomen dar
0,5751 Trahtet wer d' bote mvge sin .
0,5752 der dem liebem h'ren min
0,5753 Div maer tvo chvnt alzehant ."
0,5754 "ez ist nieman baz dan- . volchnant"
0,5755 Sprach d' herzoge friderich .
0,5756 daz dovht si gvt algelich
0,5757 Volchnant der v'svnnen .
0,5758 wart schire dar gewnnen .
0,5759 Im wart div botschaft geseit .
0,5760 des was volchnant bereit
0,5761 wan er reit et vil g'ne
0,5762 die reise gegen B'ne
0,5763 Snelle er gevertiget wart .
0,5764 von Meilan ovf die vart .
0,5765 Er chvnde die rehten maze .
0,5766 er v'meit alle straze .
0,5767 Vnd streich die wilde vb' lant .
0,5768 vaste gahte volchnant .
0,5769 Der reis er sich gar bewach .
0,5770 er streich vnz an den fvmften tach
0,5771 Er lie sich nindert . ovf haben .
0,5772 vnz reht ze B'n ovf den graben
0,5773 Swer im die weil wider reit
0,5774 dem wart vil chleine geseit
0,5775 Nv svlt ir horen sicherlich
0,5776 in der vrist was Ermrich
0,5777 Div maer drate chvnt getan .

0,5778 daz wider in waer Mailan
0,5779 vnd riht sich gegen im ze wer
0,5780 dar chert er vnd daz starche her
0,5781 Nv wil ich evch wizen lan
0,5782 wie Volchnant der chvne man
0,5783 Chvnt tet da die maere
0,5784 dem edelem B'naere
0,5785 Ein degen heizet Volchnant
0,5786 der chom ze B'n fvr gerant
0,5787 "Nv wol ovf h're dietrich
0,5788 sere riwest dv mich
0,5789 Dir hant die Ermriches man .
0,5790 so vil ze leide getan .
0,5791 Si ligent ovf diner marche
0,5792 si brennent da vil starche
0,5793 Nv lose wip vnde chint
0,5794 die mit vil grozen noten sint
0,5795 Nv wol ovf degen here .
0,5796 als liep dir sei din ere
0,5797 Dv solt dar vmbe niht v'zagen
0,5798 ich wil dir endelichen sagen"
0,5799 Sprach Volchnant zv dem waht'e
0,5800 "nv weche den B'naere
0,5801 Dv sag dem vnv'zagtem man
0,5802 er hat wider Meilan ."
0,5803 der waht' gaht in den sal .
0,5804 er rief daz iz lovt erhal .
0,5805 "Wol ovf edel Dietmares chint .
0,5806 boten an dem graben sint
0,5807 Die sagent starchiv maere"
0,5808 do wacht der B'naere
0,5809 vnd ovch die recken vberal .
0,5810 die bi im lagen ovf dem sal .
0,5811 Man da wider man dranch
0,5812 a hy wie d' B'ner spranch
0,5813 Gegen der port an daz tor
0,5814 da hielt der recke Volchnant vor
0,5815 Div port wart balde vof getan .
0,5816 volchnant wart in v'lan
0,5817 als in her Dietrich an gesach
0,5818 vrolich er zv im da sprach .
0,5819 "Got willechomen Volchnant"
0,5820 "genade h're" sprach d' wigant
0,5821 "Nv sit ovch ir got willechome
0,5822 wol mich daz ich han v'nome-
0,5823 Iwer stimme vnd iweren mvnt
0,5824 daz ist mir ein saeligiv stvnt"
0,5825 Her dietrich sprach "got lone dir

0,5826 h're volchnant sage mir
 0,5827 Waz sint div maer die dv sagest
 0,5828 daz dv also sere iagest
 0,5829 Daz devtet etlich wnder .
 0,5830 daz tvo vns chvnt besvnder"
 0,5831 "Herre ich han iv maere braht"
 0,5832 hie wart swigens gedaht
 0,5833 Volchnant hvop ovf vnde saget
 0,5834 dem edelen fvrsten vnverzaget
 0,5835 "herre ir habt wider Meilan .
 0,5836 Tydas vnd ander iwer man .
 0,5837 Die sint alle dar inne .
 0,5838 nv merchet in iwerem sinne .
 0,5839 Waz si iv enboten hant .
 0,5840 daz sag ich iv" sprach volchnant .
 0,5841 "Vil gvtlichen gar
 0,5842 welt ir si choment iv fvr war
 0,5843 Herre min von B'ne
 0,5844 nv svlt ir horen g'ne
 0,5845 waz si iv helfe bringent .
 0,5846 vil sere si an ivch dingent
 0,5847 Ich wil iv nennen wer si sint
 0,5848 edel dietmares chint .
 0,5849 Nv chvmt der starche Sabne .
 0,5850 vnd friderich von Rabne .
 0,5851 Streither vnde Starchan
 0,5852 vnd von osterfranchn H'man .
 0,5853 her stovdfvchs von reine
 0,5854 von metzen ortwine .
 0,5855 Von pole min her perhtran .
 0,5856 der chvmt vnd her elsan .
 0,5857 Vnd der chvne Svgebant
 0,5858 Randolt vnd her Schiltrant
 0,5859 Vnd der chvne Sygeher .
 0,5860 ekkenot der chvmt ovch her
 0,5861 So habt ir Wolfharten
 0,5862 vnd den chvnen Helmscharten .
 0,5863 So habt ir ovch bei iv Neren
 0,5864 ez welle denne got v'cheren
 0,5865 amelolt vnd alphart .
 0,5866 die bede sint an diner vart .
 0,5867 Hilpbrant vnde Herebrant .
 0,5868 die beide helde zehant
 0,5869 Die helfent dir vil starche
 0,5870 ze reten dine marche"
 0,5871 In der zit do daz geschach
 0,5872 einen boten man dort h' strichen sach
 0,5873 Den het vrov helche gesant

0,5874 dem h'ren dietrich in sin lant
 0,5875 dar vmbe daz er im sagte .
 0,5876 vnd die weil niht v'zagte
 0,5877 vnz daz daz her quaeme
 0,5878 der bot der wart genaeme
 0,5879 Der B'naer wart herzenvro
 0,5880 do er den boten sach do
 0,5881 Gegen im er vrolichen gie .
 0,5882 baz danne wol er in enphie
 0,5883 "Got willechomen Baltran .
 0,5884 sag an wa has tv v'lan .
 0,5885 daz her von hevnisch marche"
 0,5886 do sprach Baltran der starche .
 0,5887 "Herre die recken ziere
 0,5888 die choment iv gewislich schire .
 0,5889 Dar vmb svlt ir niht sorgen .
 0,5890 ir seht siv benamen morgen .
 0,5891 Mit einem grozem schalle
 0,5892 hie ze B'ne alle
 0,5893 vnd wil ivch des niht v'dagen .
 0,5894 ich wil iv liebiv maere sagen .
 0,5895 In der vrist vnd ir ritet dan .
 0,5896 do chomen ahte w'de man
 0,5897 Daz si ev fvr war bechant
 0,5898 die hat ovch iv vrov helch gesant
 0,5899 daz eine daz ist Livdeger
 0,5900 vnd Levdegast ein recke her
 0,5901 Die bringent iv die chechen wer .
 0,5902 iv chvmt von Leng'es Walther
 0,5903 vnd Hagne d' vil starche
 0,5904 vnd chvmt von Bolan voz d' marche
 0,5905 Hornboge der maere
 0,5906 vil edeler B'naere
 0,5907 Iv chvmt Hivzolt von Prevzen
 0,5908 vnd Hertnit von Revzen .
 0,5909 Von antyoch chvnich Imian
 0,5910 vnd Gotel der marchman .
 0,5911 Her Evrinch vnd her Blodelin
 0,5912 vnd von Elsentroye Erewin
 0,5913 Bitrolf der Styeraere .
 0,5914 vnd dietleip der maere
 0,5915 So bringet iv vil der schilde
 0,5916 Rvdeger der milte
 0,5919 Ez chvmt von chriechen h' dietrich
 0,5920 vnd von Lvnders helpfrich
 0,5921 Die recken vnverzeit
 0,5922 die bringent schare bereit
 0,5923 nv horet chvnich von romisch lant

0,5924 so hat iv min vrov Helch gesant
0,5925 vier vnd zweinzech tovsent man .
0,5926 die svlt ir besvnder von ir han”
0,5927 Dirre starchen maere .
0,5928 war vro der B’naere .
0,5929 Er beit chovm daz div naht
0,5930 den anderen tach braht
0,5931 Do er den tach gelebte
0,5932 der vogt von B’ne gebte
0,5933 vil manigen meiden vnd march
0,5934 div edelen castelane starch
0,5935 Gab er den edelen recken .
0,5936 vnd mante sere die chechen .
0,5937 Daz si im hvlfen siniv lant
0,5938 retten mit ellenthafft’ hant
0,5939 In der zit do chomen maere .
0,5940 “wol ovf her B’naere .
0,5941 vnd heizet rihten die bvrch ze w’
0,5942 dort seiget her ein chreftich her”
0,5943 Do sprach d’ stanche Baltran .
0,5944 “h’re daz sint die helchen man
0,5945 Die iv ze helfe sint gesant
0,5946 daz ist mir waerlich bechant
0,5947 Si seigent vast mit scharn her
0,5948 die vanen vliegent entw”
0,5949 als daz her dietrich het v’nome-
0,5950 er sprach “die sin got willechome-
0,5951 Nv wol ovf helde vil gemeit .”
0,5952 her dietrich ovz der stat do reit .
0,5953 Im folgten vier hvndert man .
0,5954 er wolt die geste wol enphan
0,5955 nv habt ir hie mit wol v’nom-
0,5956 nv was ovch daz her chomen
0,5957 zv der stat so nahen
0,5958 daz s h’ dietrich wold enphahen
0,5959 Do sprach d’ macgrave Rvdeger .
0,5960 “dort ritet des landes vogt her .
0,5961 Nverbeizt nider alle”
0,5962 daz geschach mit eine- schalle
0,5963 her dietrich vnde sine man .
0,5964 die liefen lieplichen an
0,5965 Die hohen werden geste .
0,5966 div vrevde wart so veste
0,5967 Bedenthalp zwisschen in getan
0,5968 da wart nieman vngrvzet lan
0,5969 da herbergt man vof daz velt .
0,5970 man hiez da geben wider gelt
0,5971 Spise trinchen vngezalt

0,5972 der schal wart groz manichvalt
 0,5973 Si heten chreftige maht
 0,5974 der levt den hort dar braht .
 0,5975 Do div naht zvo steich
 0,5976 ein bot dort h' vber velt seich
 0,5977 Den het Ivbart von Latran .
 0,5978 dar gesant von Meilan
 0,5979 der sagt dem B'naere
 0,5980 div starchen niwen maere
 0,5981 also der bote chomen was
 0,5982 do stvont er nider vof daz gras
 0,5983 Her dietrich in do wol enphie
 0,5984 do dancht im d' bote hie
 0,5985 Er sprach "h're von B'ne
 0,5986 wir saehen ivch harte g'ne
 0,5987 wir sin et vaste besezzen .
 0,5988 Ermrich d' vermezzen
 0,5989 der stvrmet sere alle tage
 0,5990 nv m'chet reht waz ich iv sage
 0,5991 Ez sei iv liep oder zorn
 0,5992 chomt ir niht so habt ir v'lorn .
 0,5993 die stat vnd alle die dr inne sint
 0,5994 man toetet weip vnde chint .
 0,5995 wir sin vil gar nach alle v'zagt .
 0,5996 nv sei iv h're fvr war gesagt
 0,5997 Swie dv v'livsest Meilan .
 0,5998 des mvest dv imm' schaden han ."
 0,5999 "Daz svl wir vil wol bewarn .
 0,6000 so svl wir e . dar varn .
 0,6001 vnd die stat da retten .
 0,6002 daz velt mit toten betten
 0,6003 Nv wol ovf mage vnde man .
 0,6004 vnd gedenchet alle dar an .
 0,6005 Daz ir mir triwe habt gegewen .
 0,6006 swer dvrch mich ere vnde leben
 0,6007 Hivte wagt in dirre not .
 0,6008 vm den dien ich z vnz an mine- tot"
 0,6009 do sprach d' marcgrave Rvdeger
 0,6010 "wir sin vmb daz bechome- her
 0,6011 Ich vnd mine gesellen .
 0,6012 daz wir wagen wellen
 0,6013 Beidiv liep vnde gvot .
 0,6014 dvrch dich fvrste hohgemvot
 0,6015 Nv aht daz helt dietrich
 0,6016 edel chvnich von romisch rich
 0,6017 daz ist dir ovch daz beste
 0,6018 wie dv lazest dine veste"
 0,6019 "daz han ich geahtet schire"

0,6020 sprach von B'n d' zire
0,6021 "hie ze B'ne wil bestan
0,6022 Starcher vnde Elsan
0,6023 vnd ovch ir helfaere"
0,6024 sprach d' B'naere
0,6025 "an die wir vns mvgen lazen
0,6026 ovf steigen vnd ovf strazen"
0,6027 Daz wart hie mit snelle getan .
0,6028 Wolfhart d' chvne man .
0,6029 Sprach als ein vnv'zagt' degen
0,6030 "wir solden stvnt sin aft' wegen .
0,6031 zv den vinden ovf daz wal
0,6032 rotiret ivch helde vb'al .
0,6033 Vnd vrevt ivch dirre vreise
0,6034 wir chome- Ermrich ze vreise"
0,6035 da mit daz her was bereit .
0,6036 hie mit man niht lang' beit
0,6037 Den vanen hiez h' dietrich .
0,6038 der da hort ze romisch rich
0,6039 vil balde ane binden .
0,6040 "nv laz vns got vinden
0,6041 die veinde ze rechter lage
0,6042 a hy wie ich z da wage"
0,6043 Sprach der starche Wolfhart
0,6044 "si werdent chleine gespart .
0,6045 Nvtra helde lobesan .
0,6046 ich mein die Ermriches man
0,6047 Nv howet in tiefe wnden
0,6048 die nimm' mer gebvnden
0,6049 Werden vnz an den lesten tach
0,6050 ich sol z da schaffen ob ich mach
0,6051 Dazz mvoter chint beweinen mvoz
0,6052 wir machen in lebens mit tode bvoz
0,6053 Ich geriche minen smerzen .
0,6054 ez leit in mine- h'zen
0,6055 div groz vntriwe vnd ovch d' rat .
0,6056 den er vns lange getan hat"
0,6057 Nv laze wir div maere stan .
0,6058 daz her seich gegen Meylan
0,6059 vber velt vnd vber lant
0,6060 in was div straze wol erchant
0,6061 Si zogten mvzechlichen .
0,6062 d' chvnich von romisch richen .
0,6063 der trost den sinen wol ir mvot
0,6064 "v'zagt niht edele helde gvt
0,6065 Gelovbt mir div maere"
0,6066 sprach d' B'naere
0,6067 "Wir beiagen benamen ere

0,6068 des wir imm' mere
0,6069 Haben frvm die weil wir leben
0,6070 ich wil iv mine triwe geben"
0,6071 Sprach d' vogt von B'ne
0,6072 "swer mir hilfet g'ne .
0,6073 Dem tvon ich daz gvot
0,6074 des sich vrevt wol sin mvot"
0,6075 da wart vil trahtens getan
0,6076 vnz daz daz her lobesan
0,6077 Ze meilan chome- was so nach
0,6078 daz man die veinde ligen sach
0,6079 daz was reht an dem ahtem tage
0,6080 nv m'chet eben waz ich iv sage
0,6081 der tach gescheiden was von dan
0,6082 div naht begvnde slichen an .
0,6083 Nv svlt ir horen g'ne
0,6084 daz starche her von B'ne
0,6085 Herw'get nider ovf daz velt
0,6086 da hebt sich d' widergelt
0,6087 Mit grimme vnd mit zorne
0,6088 die recken ovzerchorne .
0,6089 die lovten sich mit schalle
0,6090 ob ez ev wol gevalle
0,6091 So rvcht v'neme- an dirre zit .
0,6092 wie sich hebe d' strit
0,6093 Daz wil ich evch wizzen lan
0,6094 als ich z reht v'nom- han .
0,6095 do wart des niht v'gezzen .
0,6096 als man het gemezzen
0,6097 Hie wart gesetzet an den rat
0,6098 die hoehsten die h' dietrich hat
0,6099 Mit im braht an den strit
0,6100 die rieten alle in d' zit
0,6101 "Edele vogt von B'ne
0,6102 nv hort wir alle g'ne
0,6103 wie wir tvon wolden
0,6104 od wie wir varen solden
0,6105 Hie zvo hoeret wiser rat
0,6106 Ermrich mehtich h' hie hat"
0,6107 Do sprach d' h're dietrich
0,6108 "swie ir nv ratet algelich
0,6109 also var ich" sprach d' helt gvot
0,6110 Rvdeger d' hohgemvot
0,6111 Der getriwe vnd d' gewaere
0,6112 d' riet dem B'naere
0,6113 "Mich devht gvot chvnich von Romisch lant
0,6114 daz ir boten sendet alzehant
0,6115 zvo dem Ermriches her

0,6116 die betrahten chvnnen alle ir w'
0,6117 Vnd vns sagen ir gelegenheit"
0,6118 sprach Rvdeger der vnv'zeit
0,6119 Im antwrte von B'n d' hohgemuot
0,6120 er sprach "vns si dar zv gvot
0,6121 die heiz ich iezvo riten fver
0,6122 die betrahten mit reht' chver
0,6123 daz ez vns mach ze frvm gestan
0,6124 wederthalp wir si rennen an
0,6125 Noch heinte vmbe mite naht
0,6126 mir ist gesaget si haben maht
0,6127 So michel vnd so starche
0,6128 daz wir in ovf d' marche
0,6129 Nich tvrren wid'riten
0,6130 wir mvgen ovch niht gestriten
0,6131 Mit in offenlichen .
0,6132 iz ist mit Ermrichen .
0,6133 Wol zwelf fvrsten h' bechome-
0,6134 daz ich waerlich han v'nom-"
0,6135 "Daz ist niht ein wnder
0,6136 ir geleit dest mer vnder"
0,6137 Sprach d' starche Wolfhart .
0,6138 "mir geliebt nie dechain vart
0,6139 So vast in mine- mvote
0,6140 got fvege mir z ze gvote"
0,6141 Nv wart ovz dem her genom-t
0,6142 die fver ovf die wart solden chom-
0,6143 Daz eine daz was Volchnant
0,6144 daz ander her Sygebant
0,6145 Hildebrant was daz drite
0,6146 ze horen ich ivch bite
0,6147 Daz vierde daz was Nere
0,6148 nach Hildebrandes lere
0,6149 Cherten s eine straze
0,6150 si chomen in der maze
0,6151 Zv dem her ovf einen le .
0,6152 "ir helde nv sprechet niht me ."
0,6153 Sprach d' recke Hildebrant
0,6154 "nv lvsent ebene zehant
0,6155 Ob ieme- an vns rite
0,6156 daz wir vns gen dem strite
0,6157 . e . gerihten daz ist gvot"
0,6158 des volgten im die helde hohgemvot
0,6159 do si also hielten da
0,6160 vil schir do sahen si sa
0,6161 Wol tovsen fiwer brinnen
0,6162 vnd dar vmbe winnen
0,6163 Die levte sam si tobten

0,6164 die chvnen hohgelobten
0,6165 Ich mein die dietriches man
0,6166 ieslicher wnschen began
0,6167 “O we vogt von romisch lant
0,6168 waerest dv nv hie alzehant
0,6169 Dv vnd dar nach alle dine man
0,6170 so mvoste wir die veinde an .
0,6171 Endichlichen rieten”
0,6172 do sprach an den ziten
0,6173 Der vnv’zagte hildebrant
0,6174 “daz widerriet ich alzehant
0,6175 Si tvont ez vns leiht ze sehen .
0,6176 wir svlen . e . vil eben spehen
0,6177 wes si sich dort rihten .
0,6178 nv svle wir vns phlihten .
0,6179 Mit getrevlichem mvote
0,6180 daz rat ich” sprach d’ gvote
0,6181 “ob vns ieman an rite
0,6182 d’ liht mit vns strite
0,6183 So hveten daz wir bi einand’ gesten”
0,6184 Nere sprach “daz sol ergen .”
0,6185 Die chvenen vnd die starchen
0,6186 die gvrten vast ir marchen
0,6187 Si begvnden riten hin zvo baz
0,6188 si waren ir mvotes niht ze laz
0,6189 Si sahen daz daz starche her .
0,6190 vngewarnet lach vnd ane w’
0,6191 Hildebrant noch mere sach
0,6192 si schvffen in da gvot gemach
0,6193 Si begvnden sich enpheten
0,6194 dise sazen ovf den beten .
0,6195 Iene hvoben dort grozen schal .
0,6196 so v’mazen sich die vberal .
0,6197 waz si wnders wolden began .
0,6198 so si die veinde saehen an
0,6199 Ditz hort allez Hildebrant
0,6200 zv den sinen sprach er alzehant
0,6201 “Wir haben die gelegenheit
0,6202 hie gesehen vil bereit .
0,6203 Nv svl wir fvr baz riten .
0,6204 vnd hie niht leng’ biten .
0,6205 vnd sehen ob sich daz her
0,6206 alswa inder riht ze wer”
0,6207 Si riten neben dem her nider
0,6208 als ez in chom ze gvot sider
0,6209 Si bechomen an eine stat
0,6210 als mir daz bvoch gesaget hat
0,6211 Da begvnden sich mit sachen

0,6212 heinlichen ovf machen
0,6213 Vil nahen zweizech tovsent man
0,6214 die besten die Ermrich mohte han
0,6215 vber al dise degene
0,6216 was ze hovpman gewegne
0,6217 Her witege vnd her wate
0,6218 ditz was geschehen mit rate
0,6219 Hildebrand hort allez ir trahten .
0,6220 wie si z begvnden ahten .
0,6221 Er hort ovch wie her witege sprach
0,6222 “nv lat iv sin niht ze gach
0,6223 Vnd wert enein vil rehte
0,6224 ir recken vnd ir chnehte
0,6225 Ze welher zit wir an si chom-
0,6226 daz het ich g’ne v’nomen”
0,6227 Wate sprach “daz wil ich iv sagen
0,6228 . e . iz morgen welle tagen
0,6229 So svl wir rehte bi in sin
0,6230 . e. daz d’ lihte svnneschin
0,6231 Levht vnd d’ schone tach
0,6232 so ist geschehen swaz ergen mach
0,6233 Ich weiz wol daz da schade geschiht .
0,6234 want si wizzen vnser niht
0,6235 Si hant sere gestrichen .
0,6236 in ist noch vntwichen .
0,6237 div mvede sicherliche
0,6238 nv svlt ir helde ellens riche
0,6239 dar vmbe deheine sorge han .
0,6240 wir gesigen in endelichen an .”
0,6241 Wie ez allez ist bechomen
0,6242 daz hat nv Hildebrant v’nom-
0,6243 Ze sinen geverten er do sprach .
0,6244 “nv sol vns wid’ wesen gach”
0,6245 Bi dem h’ si niht mere biten .
0,6246 si chomen balde geriten .
0,6247 Zv ir her alzehant
0,6248 da si den chvnich von romisch lant .
0,6249 Mit schalle do fvnden
0,6250 si gie-gen bi den stvnden
0,6251 Fvr den B’naere
0,6252 vil manich recke maere
0,6253 Sach si da vil g’ne
0,6254 also tet ovch d’ von B’ne
0,6255 do si her dietrich ane sach
0,6256 nv svlt ir horen wie er sprach
0,6257 “Nv sit willechome- mir
0,6258 nv edele helde wie habt ir
0,6259 Getrahtet vnser reise

0,6260 mvg ab wir vnser vreise
 0,6261 an Ermrich ind' gerechen ."
 0,6262 do begynd zehant sprechen
 0,6263 Der vnv'zagte Hildebrant
 0,6264 "ich rat iv chvnich von romisch lant
 0,6265 vil richer chvich hohgemvot
 0,6266 ez chvmt iv niht ze gvot
 0,6267 Bestet ir Ermrichen
 0,6268 so mvzet ir im entwichen .
 0,6269 Er hat imm' wol drizech man
 0,6270 ovf vnser einen wil dv z v'stan"
 0,6271 Ditze was Wolfharten leit
 0,6272 mit zorn sprach d' helt gemeit
 0,6273 "Herre von B'n ditz ist niht war
 0,6274 wan si nie bechomen dar
 0,6275 Noch gesahen ovch die veinde nie"
 0,6276 Hildebrant der sprach hie
 0,6277 "Herre von B'n gehabt ivch wol
 0,6278 gvtiv maer ich iv sagen sol
 0,6279 Nv heizet lieb' h're min
 0,6280 alle die bereit sin
 0,6281 die ir mit iv mvget han .
 0,6282 ez wellent die Ermriches man .
 0,6283 Benamen mit vns striten .
 0,6284 vnd in die herb'ge riten .
 0,6285 wand ich bin allez bi in gewesen
 0,6286 si hant alle die ovz gelesen .
 0,6287 Die tiwersten di si mvgen han
 0,6288 vnd ist Wate hovpman .
 0,6289 Vnd h' Witege d' degen"
 0,6290 do sprach von B'n d' bewegen
 0,6291 "Ia h're wie vil mag ir sin ."
 0,6292 er sprach "daz tvon ich iv schin
 0,6293 Zweinzech tovsent ist ir niht baz
 0,6294 die bringent si her wizet daz ."
 0,6295 "nv schaffet ez" so sprach Hildebrant
 0,6296 . "si reitent vns reht in die hant"
 0,6297 Vro wart der B'naere
 0,6298 er bat die recken maere
 0,6299 "Nv traht wie ez evch dvnychet gvot"
 0,6300 Rvdeger sprach "nv tvot
 0,6303 welt ir nv ere gewinnen
 0,6304 so traht in ivren sinnen .
 0,6304a der vns ze staten mach gestan
 0,6304b wir svln zweinzech tovsent man .
 0,6304c Schicken an disen ziten
 0,6304d si svlen slehtes riten .
 0,6304e In die h'berge Ermrichen

0,6304f so hab wir vollechlichen
0,6304g vnseren mvot v'endet
0,6304h vnd wirt Ermrich geschendet
0,6304i Ovch fvgt vns got leicht ze heile
0,6304j Daz vns wirt ze teile
0,6304k Der vngetriwe Ermrich"
0,6304l h're min her dietrich
0,6305 daz ir mit willig' chvor
0,6306 zweinzech tovsent sendet fver
0,6307 die sich legen in ein hvote
0,6308 vnd gebiet den helden gvote
0,6309 daz si so lange da beiten
0,6310 vnz daz si sehen rieten
0,6311 Die veinde mit gewalde
0,6312 vnd bitet die recken balde
0,6313 Daz si in der hvote so lange biten
0,6314 vnd so wir dan- hie gestriten
0,6315 So svln die notvesten .
0,6316 hinde ovf die veinde bresten
0,6317 So sint si zwisschen vnser schar
0,6318 so entwrche wir si schire gar
0,6319 So ist iz vmb si ergangen
0,6320 geslagen vnd gevangen
0,6321 werdent die Ermriches man
0,6322 so ist iz vns wol ergan
0,6323 In d' zit was alphart chome-
0,6324 als ich fvr war han v'nom-
0,6325 vnd an den bvochen gelesen .
0,6326 der was ovch bi den vinden gewesen .
0,6327 vnd het ir gelegenheit gesehn .
0,6328 vnd ovch die stat eben gespehen
0,6329 wa man die veinde an rite
0,6330 vnd ane sorge mit in strite
0,6331 als in gesach dietmares zart
0,6332 er sprach "got willechom- alphart ."
0,6333 "Genade h're von B'ne
0,6334 welt ir gewinnen g'ne
0,6335 Beidiv frvm vnd ere
0,6336 so sovm t ivch nv niht m'e
0,6337 Ez leit allez Ermriches her
0,6338 vngewarnet ane wer"
0,6339 Her alphart im do also riet
0,6340 da mit Ermrich von eren schiet
0,6341 "Wir svlen mit ellens hende
0,6342 an rennen daz her an eine- ende
0,6343 Dvrch not rovment si vns die stat
0,6344 mit swerten hov wir ein phat
0,6345 Wir mvgen harte wol gesigen .

0,6346 si lazent gvot vnd ere ligen .
0,6347 So hab wir vnsern degen
0,6348 des goldes vil ze wegen .
0,6349 Daz rat ich” sprach d’ gvote
0,6350 “so has tv nach dine- mvote
0,6351 dinen willen wol getan .
0,6352 vnd last dv iz also ergan .
0,6353 Wir toeten si an allen schaden
0,6354 alle die Ermrich hat her geladen
0,6355 Die vah wir” sprach der helt balt
0,6356 “so chvmt wider in din gewalt
0,6357 Swaz er dir hat betwngen an .”
0,6358 do sprach d’ milte marchman .
0,6359 “Ditz ist der allerbeste rat
0,6360 den ieman hie getan hat .
0,6361 Nv seht wie wol ez vns ist chome-
0,6362 nv wirt Ermrich beide genome-
0,6363 Levte gvot vnd ere .
0,6364 waz welle wir danne m’e
0,6365 So ez vns wol ergangen ist
0,6366 nv rat ich den allerbesten list
0,6367 Der vns ze staten wol mach stan .
0,6368 daz wir gevangen fvren dan .
0,6369 dinen veter Ermrich”
0,6378 do sprach der herre dietrich
0,6379 “Nv fveg iz got dvrch sinen tot
0,6380 so wrd elliv min not
0,6381 verendet sicherlichen
0,6382 gevieng wir Ermrichen”
0,6383 Nv wart hie mit geachtet
0,6384 vnd allez sleht betrachtet
0,6385 Zweinzech tovsent helde gvot
0,6386 wrden geleit in die hvot
0,6387 Daz was vngewendet
0,6388 die helde wrden gesendet
0,6389 Zv dem her an die stat .
0,6390 daz was Rvdeg’es rat .
0,6391 do wrden zweinzech tovsent man
0,6392 ovf dem wale hie v’lan
0,6393 “Nv trahtet” sprach her Rvdeger
0,6394 von Bern hoher fvrste her
0,6395 “Wen schaffet ir ze hovptman .
0,6396 die daz her dort rieten an .”
0,6397 “Welt ir daz wil ich selbe sin
0,6398 div reise ist pillichen min”
0,6399 Sprach d’ vogt von B’ne
0,6400 “wan iz tvot nieman so gerne”
0,6401 da mit mvoz iw’ got phlegen .

0,6402 vnd hab ovch mich in sinem segem .
0,6403 “vnd helf mir got” sprach Dietrich
0,6404 “daz wir anander vroelich
0,6405 vinden vnde mvezen sehen
0,6406 got laz vns vil wol geschehen .”
0,6407 “Daz fvge got” sprach Rvdeger
0,6408 da wart gebiten niht mer
0,6409 Einen vanen dietrich an gebant
0,6410 vnd fvt in selb in siner hant
0,6411 Vber heide strichen si da hin
0,6412 si wolten werben vm gewin
0,6413 Also die helde maere
0,6414 mitsamt dem B’naere
0,6415 Bechomen in des strites zil
0,6416 nv horet waz ich iv sagen wil .
0,6417 Da gyrten si den marchen
0,6418 die chvnen vnd die starchen
0,6419 die sazen ovf ir Kastelan
0,6420 wolfhart sprechen began
0,6421 “Nv vrevt ivch helde gvote
0,6422 wir svln in mannes blvot
0,6423 waten vnz vber die sporn
0,6424 ir chvnen recken ovzerchorn
0,6425 Div sper svl wir verstecken
0,6426 vnser leit an in gerechen
0,6427 wir machen saetel laere
0,6428 ir edele helde maere
0,6429 wir svln z also schaffen .
0,6430 daz laien vnde phaffen
0,6431 von dirre vreise maer sagen
0,6432 als iz noch hivte welle tagen
0,6433 Daz man so vil der toeten
0,6434 der veinde nider schroten
0,6435 So vrevt sich min herze
0,6436 vnd endet sich min smerze
0,6437 a hy waz vrevden mir geschiht
0,6438 swen- noch hvt min ovg an siht
0,6439 Daz sich die gyer vnd die raben
0,6440 mit dem blvot mvzen laben
0,6441 Nv wol ovf edele helde starch
0,6442 vnd sitzet ovf div gvoten march”
0,6443 Daz geschach alzehant .
0,6444 si zogten vnd’ schildes rant
0,6445 Zvo den veinden vb’ heide wiet
0,6446 “nv waer bvhrdires zit”
0,6447 Also wolfhart daz sprach
0,6448 nv horet wie daz geschach
0,6449 Daz treib ovch der von B’ne

0,6450 des waren hvlfich im vil g'ne
0,6451 die sinen die da mit im riten
0,6452 hie wart langer niht v'miten
0,6453 Si heten sich ze vier schar geslagen
0,6454 ich wil iv endelichen sagen
0,6455 Si prasten mit ir maehtich wer
0,6456 an einem orte in daz her .
0,6457 also daz do geschach
0,6458 daz man in daz her prach
0,6459 Do wart michel d' schal
0,6460 her dietrich schrei daz ez erhal
0,6461 "ah tschavelir B'ne"
0,6462 daz horten vil vng'ne
0,6463 alle Ermriches man
0,6464 sich riht ze wer nieman
0,6465 Wand si heten d' weile niht
0,6466 des noch harte vil geschiht .
0,6467 Des wart schade da groz genome-
0,6468 si liezen nieman hin chomen .
0,6469 Die edelen dietriches degen
0,6470 die begvnden starchs strites phlege-
0,6471 Si slvogen si stachen
0,6472 ir leit si vaste rachen
0,6473 Si entworhten helde gvote
0,6474 wolfhart der hohgemvote
0,6475 Schre als ein wotend' man .
0,6476 "nv lat genesen nieman
0,6477 Swaz ir der Ermriches vindet
0,6478 nimm' ir erwindet
0,6479 Ir slahet si alle geliche
0,6480 wir svln an Ermriche
0,6481 Hivte rechen vnser leit
0,6482 daz manich vrowe h' nach chleit"
0,6483 da was not vnd vngemach
0,6484 in der zit man dort her chome- sach
0,6485 Stritheren von tvsckan
0,6486 dem folgten zwei tovsent man
0,6487 Vnder helme vnd in halspgen
0,6488 den wilden getw'gen
0,6489 Fvren si vil nach geliche
0,6490 mit ellen sicherliche
0,6491 Si fvrten cholben vn- swert .
0,6492 "daz sint d' min h'ze gert"
0,6493 sprach d' edele B'naere
0,6494 "nv zvz in helde maere"
0,6495 Da wart ein dar rucken
0,6496 da hyp sich ein zvckchen
0,6497 die scharpfen g'n mit handen .

0,6498 zesamne si geranden
0,6499 Die sper si verstachen .
0,6500 die Ermriches rachen
0,6501 Ir leit an den von B'ne
0,6502 si wolten retten g'ne
0,6503 Ir herren ere vnd ir gvot
0,6504 da chomn zesamne die hohgemvot
0,6505 Der stvrm vast gie entwer
0,6506 man sach vliegen manige- ger
0,6507 vber helm gegen den lvften .
0,6508 da waren chome- mit gvften .
0,6509 Zesamne helde vil gvote
0,6510 mit grimichlichem mvote
0,6511 Der stvrm vnd der starche strit
0,6512 der wert vnz ovf frvoimbizzit .
0,6513 daz velt vnd daz breite wal .
0,6514 daz ran mit blvote vberal .
0,6515 Si vahten grimmichliche .
0,6516 beidenthalp geliche
0,6517 Da was wan ach vnde not
0,6518 daz . e was grven da wart iz rot
0,6519 Von maniges mannes blvote
0,6520 da stvrben helde gvote
0,6521 daz starch Ermriches her
0,6522 des chom vil wenich iht ze wer
0,6523 an Strither von Tvsckan .
0,6524 vnd von Spolit Tvryan .
0,6525 Vnd heime der maere
0,6526 die drie fvrsten lobere
0,6527 die fvrten sechs tovsent man .
0,6528 Die werten daz wal vnd den plan
0,6529 So rehte vreislichen .
0,6530 die frvemten dietrichen .
0,6531 Vil manigen chreftigen schaden
0,6532 da was chraft vberladen .
0,6533 Bedenthalp si sich w'ten .
0,6534 ovf die helme si da berten
0,6535 Daz blvot dvrch die haersnir spranch
0,6536 in die choeph daz ez erchlanch
0,6537 Vil manich pitterlicher slach
0,6538 sich chlvben die helm vnz in den nach
0,6539 Man sach da bresten den herten stal .
0,6540 die von sw'ten gewnnen nie mal
0,6541 Die wrden des tags v'schert
0,6542 ich mein die brvnnen hert
0,6543 da dvrch wrden wnden geslagen .
0,6544 ich wil iv noch mere sagen
0,6545 o we welich not da ergie

0,6546 man hort die we schreien hie
0,6547 Si genvogt des strites niht ovch .
0,6548 der tvnst vz ir libe rovch
0,6549 Gelich in der gebaere
0,6550 sam ob ein walt waere
0,6551 Gezvndet an mit vivwer
0,6552 si gvlten harte tiwer
0,6553 den solt mit todes ende
0,6554 vmb disen mort got schende
0,6555 Den chvnich Ermrichen
0,6556 des wnsch ich herzenlichen
0,9233 daz velt perge vnde tal
0,9234 allez von ir slegen hal
0,9235 von alzay her wolfger
0,9236 vnd wolfhart d' recke her
0,9237 die waren zv einand' chomen
0,9238 nv habt ir e wol v'nomen
0,9239 Die waren chvne beide
0,9240 sich hvop ovf d' heide
0,9241 Ein stvrm vreisliche
0,9242 von Lvnders Helphriche
0,9243 den bestvont d' starche ladimer
0,9244 von Leng's walther
0,9245 Der bestvont den starchen Hivzolt
0,9246 si arnten also daz golt
0,9247 daz ez si sow' mvost an chom-
0,9248 nv han ich ovch daz wol v'nom-
0,9249 Mit wem h' dietleip da streit
0,9250 daz hat man mir wol geseit
0,9251 Den het heime bestan
0,9252 also was man wid' man
0,9253 an dem strite gewegen
0,9254 da wart stvrms gephegen
0,9255 von morgens vnz ovf mitentach
0,9256 wer siglos da gelach
0,9257 daz wil ich ivch wizen lan
0,9258 daz was Gvnther vnd sine man
0,9259 was daz niht ein michel not
0,9260 die zweinzech tovsent lagen tot
0,9261 des chvnich Gvnth'es man
0,9262 der chom nie dehein' dan
0,9263 Niwan zwen vnd drizech
0,9264 wolfhart was des vlizech
0,9265 daz ovch die waeren da erslagen
0,9266 nv hore wir daz bvoch sagen
0,9267 flvhtich wart Gvnth' d' rich
0,9268 ab dem wal vor dietriche
0,9269 des chvnich Gvnth'es man

0,9270 die heten grozen schaden getan
0,9271 an den Hivnen ovf dem wal
0,9272 ich han z lazen ovz d' zal
0,9273 daz ich iz nimm' tar gesagen
0,9274 so vil als ir da wart erslagen
0,9275 Nv seht welch not da was
0,9276 daz velt blvomen vnde gras
0,9277 vb'al von blvte ran .
0,9278 man sach die gvsse enowe gan
0,9279 Sam von regen tvot ein pach
0,9280 die toten niema- vor blvote sach
0,9281 Als Gvnth' ab dem wal entran
0,9282 vnd d' von B'ne den sic genam
0,9283 In d' zit was ovch chomen
0,9284 als ich fvr war han v'nom-
0,9285 Diezolt von Grvnelant
0,9286 ein- vanen fvr er in d' hant
0,9287 der was vberal rot
0,9288 d' helt sich ze stvrme bot
0,9289 vnd' sinem vanen breit
0,9290 aht tovsent rekchen gemeit
0,9291 Zogten vnd' schilde
0,9292 ob ivch des niht bevilde
0,9293 So sagt ich iv maere
0,9294 dar nach ein rekche h'e
0,9295 Zogt her mit eine- vanen
0,9296 d' daz niht wolt v'manen
0,9297 Er mvost chome- in den strit
0,9298 nv horet an dirre zit
0,9299 wie d' selbe was genant
0,9300 Stvmbger von Islant
0,9301 Dem folgten sehs tovsent man
0,9302 fvr war ich daz v'nome- han
0,9303 daz waren rekchen zv ir hant
0,9304 die man da heizet wigant
0,9305 Daz mohten wol die selbe sin .
0,9306 o we daz taten si da schin
0,9307 Mit manig' vreislich' tat
0,9308 daz bvoch mir gesaget hat
0,9309 Daz waren stvrngeiten
0,9310 in allen h'ten striten
0,9311 Die vierzehen tovsent rekchen starch
0,9312 die fvrten als manich v'dahtez march
0,9313 Mit h'tem stale wol bedaht
0,9314 sich hvop ein strit vor d' naht
0,9315 Der imm' mer ist wol ze chlagen
0,9316 von in wart manich rekche erslage-
0,9317 Si cherten s an . an einem ort

0,9318 da geschach so chreftigez mort
0,9319 an livten allenthalben
0,9320 die von allen salben
0,9321 Nimm' mer wrden heil
0,9322 da ergie ein v'teil
0,9323 da von man imm' sagen mvoz
0,9324 da wart mit tode lebens bvoz
0,9325 Gegen den vierzehen tovsent man
0,9326 chom Tydas von Meilan
0,9327 Mit ein' starchen rot geriten
0,9328 nv v'neimt mit gvoten siten
0,9329 Der wolde helfen g'ne
0,9330 sine- h'ren von B'ne
0,9331 Iene vierzehen tovsent man
0,9332 die horten Ermrichen an
0,9333 her Tydas d' gvote
0,9334 der chvne hohgemvot
0,9335 Mit dem zogten syben schar
0,9336 islich' schar daz ist war
0,9337 Waren zwei tovsent degen
0,9338 die torsten manheit wol phlegen
0,9339 In strite ze allen stvnden
0,9340 niht lang' si erwunden
0,9341 Si triben div orss mit gri-me dar
0,9342 veste was Tydas schar
0,9343 als waren ovch iene h' engegen
0,9344 da chom- zesamne chekche degen
0,9345 Her Tydas von Mailan
0,9346 der mante alle sine man
0,9347 "verzagt niht helde alle"
0,9348 den pvneiz mit schalle
0,9349 Hvben si dar . vnde her
0,9350 in was zesamne harte ger
0,9351 daz gri-me fiw' als ein lovp
0,9352 ovz den hvofeisen stovp
0,9353 an einand' brachen die schar
0,9354 mit starchen slegen daz ist war
0,9355 Ovf die helm si slvgen
0,9356 neitlich si trvgen
0,9357 div swert in den henden
0,9358 der stvrm ze allen enden
0,9359 wart als ein tvrnei
0,9360 "ach . vnde we ." da manig' schrei
0,9361 Den der grimme tot twanch
0,9362 daz hirn ovz en chopfen spranch
0,9363 Iz moht got erbarmt han
0,9364 daz blvot an den sw'ten ran
0,9365 In die hende nid' ze tal

0,9366 die helm vielen ane zal
0,9367 als taten ovch die schilde
0,9368 getvnet daz gevilde
0,9369 wart mit toten vb'al
0,9370 da was von slegen solch schal
0,9371 daz nieme- moht gehoren
0,9372 daz chrimeliche storen
0,9373 Daz si an einand' taten
0,9374 manigen div ross traten
0,9375 der wol leng' mohte leben
0,9376 da wart d' solt also gegeben
0,9377 Mit tiefen wnden witen
0,9378 daz manig' mvoz erbiten
0,9379 des ivngisten vrteiles
0,9380 o we des vneheiles
0,9381 Daz Ermrich ie wart geboren
0,9382 alle die da wrden v'lorn
0,9383 daz geschach von sine- schvlden .
0,9384 des ist er von gotes hvlden
0,9385 Gescheiden immer mere
0,9386 ez en het niht wid'chere
0,9387 Ovf dem wal dannoch
0,9388 der strit d' werte idoch
0,9389 Von mittem tag vnz an die naht
0,9390 d' ez da ovz den sorgen vaht
0,9391 Daz was ot allez Wolfhart
0,9392 Nere vnde Helmschart
0,9393 do div naht zvo seich
0,9394 wolfhart dannoch nie gesweich
0,9395 In dem h'ten strite
0,9396 vast rief d' stvrmgeite
0,9397 als ein wotvnd' man .
0,9398 "lat ir helde et dar gan
0,9399 Vnd lazet niemen genesen
0,9400 iz mvoz ir vrteil hie wesen
0,9401 wir svln ovch niht lang' leben"
0,9402 ez wart niemen vride geben
0,9403 Ivngen noch den alden
0,9404 da ergrimten die balden
0,9405 Die starchen die raezen .
0,9406 vnd ovch die wid'saezen .
0,9407 Si slvgen si stachen
0,9408 ir leit si vaste rachen
0,9409 Mit grimmigem mvote
0,9410 ez wart nie helm so gvote
0,9411 Od er spielt sich von den slegen
0,9412 bedenthalp vielen die degen
0,9413 Tote nid' ovf daz lant

0,9414 vnd wart iv dehein sne bechant
0,9415 als er von den alben gat
0,9416 noch dicher vielen an d' stat
0,9417 Die levte tot dar nidere
0,9418 beidiv fvr vnd widere
0,9419 Sach man daz fiwer glasten
0,9420 si wolden nie gerasten
0,9421 vnz daz der tach nim' schein
0,9422 wie si getrvgen daz enein .
0,9423 daz si rvobe wolden phlegen
0,9424 zwischen in wart ein vrid geben
0,9425 vnz an den and'n tach dan
0,9426 daz wid'riet do ein man
0,9427 wolfhart der maere
0,9428 des volgt der B'naere
0,9429 der vride wid'boten wart
0,9430 in der zit het sich geschart
0,9431 Pytrvnch von Engelant
0,9432 der fvort mit w'lich' hant
0,9433 Sehzenen tovsent rekchen
0,9434 die starchen vnd die chekchen
0,9435 waren da mit Ermriche
0,9436 ze schaden dietriche
0,9437 die fvrten ein schare breit
0,9438 swartz vnd weiz als man seit
0,9439 Si waren georsset alle wol
0,9440 da wid' ich iv brvven sol
0,9441 Die gegen Pitrvnge riten
0,9442 vnd ein- stvrm mit in striten
0,9443 daz was selb d' B'naere
0,9444 vnd manich rekche maere
0,9445 aht schar vil herlich
0,9446 riten mit dem h'ren Dietrich
0,9447 Islicher schar was tovsent man
0,9448 da rant ie ein' zwene an .
0,9449 da wart lachen lazen
0,9450 gelich si z dar mazen
0,9451 Zesamne brasten die schar
0,9452 ez het h' dietrich daz ist war
0,9453 Leider ze vaste nach
0,9454 ein strit da allere'ste geschach
0,9455 daz sit beweinten ovgen
0,9456 nv gelovbet svnd' lovgen
0,9457 Ez wart dvrrch halsp\ch vn- dvrrch schilt
0,9458 die scharphen gere gezilt
0,9459 Daz ez dvrrch div h'ze brast
0,9460 beidiv vrevnt vnd gast
0,9461 Mvosten da tot beleiben

0,9462 man sach zesamne triben
0,9463 den stvrm ovf der heide
0,9464 da was bosiv ovgenweide
0,9465 der strit d' was so h'te
0,9466 nieme- dem and'm w'te
0,9467 weder der vat' dem chinde
0,9468 ir slege waren so swinde
0,9469 daz ich in nie geliche sach
0,9470 manich man da gerach
0,9471 Daz von so vil levten
0,9472 in velden vnd in revten
0,9473 herter stvrm nie wart gestriten
0,9474 die halsp\ge wrden v'sniten
0,9475 Daz si enzwei hiengen
0,9476 mort si begiengen
0,9477 an einand' ovf dem wal
0,9478 da vielen ettlich ze tal
0,9479 ane hovpt vnd ane hant
0,9480 also strevten si daz lant
0,9481 von den slegen si sich pvgen
0,9482 die schilde von den handen flvgen
0,9483 Reht alsam ein dvrrez stro
0,9484 beidiv trovrich vnd vnvro
0,9485 wart vil manich w'dez wip
0,9486 vmb ir lieben mannes lip
0,9487 So chleit daz chinde vnde mach
0,9488 o we d' vil da tot gelach
0,9489 Nv horet groziv wnd' sagen
0,9490 do vnd' in wrden erslagen
0,9491 Div ovzerwelten kastelan
0,9492 do mvosten si ze fvzen gan
0,9493 alle traten si ein phat
0,9494 mit strite an der selben stat
0,9495 da gie d' stvrm vast entwer
0,9496 dise hin vnd iene her
0,9497 Der mane in schone lovhte
0,9498 nieme- den andern schovhte
0,9499 Er waer starch od' chranch
0,9500 chraft wid' chraft da ranch
0,9501 Die weil si heten deheine maht
0,9502 si schieden sich bi d' naht
0,9503 vnz d' tach wol ovf sleich
0,9504 ir halsp\ge waren also weich
0,9505 worden von d' hitze
0,9506 "waz wnd's ist ab ditze"
0,9507 Sprach d' Marcgrave Rvdeg'
0,9508 "svle wir gervowen nimm' mer"
0,9509 Do d' tach ovf gie

0,9510 dannoch weig'lichen hie
0,9511 Ze beiden handen trvoch daz sw't
0,9512 Pitrvnch d' rekche wert
0,9513 Sin schar was worden dvenne
0,9514 man vnde chvnne
0,9515 Lagen ovf dem wal erslagen
0,9516 si heten chleine v'tragen
0,9517 Den starchen Dietriches man
0,9518 die waren ovch von ir lebn getan
0,9519 alphart der maere
0,9520 lief von dem B'naere
0,9521 den chvnen Pitrvngen an
0,9522 Pitrvnch d' chvne man
0,9523 Ovch gegen alpharten lief
0,9524 si holten ovz ir h'zen tief
0,9525 Zwene slege vreislich
0,9526 Pirtvnch der ellens rich
0,9527 Traf alpharten e .
0,9528 daz der rekche nimm' me
0,9529 von der stat chom gesvnt
0,9530 alrest wart dem B'naer chvnt
0,9531 Daz allersterchiste leit
0,9532 daz im ie geschach als man seit
0,9533 do in her dietrich toten sach
0,9534 do wart im von dem grimme gach
0,9535 an pitrvngen da der stvont
0,9536 als noch die livte in zorne tvont
0,9537 Si liefen bede anand' an
0,9538 des mvost ir ein' schaden han
0,9539 Si striten eine lange zit
0,9540 vnder in herte was d' strit
0,9541 Dem B'naer wart von eine- man
0,9542 in dem strite nie so we getan
0,9543 do si striten da den strit
0,9544 vnz wol ovf frvoimbizzit
0,9545 Do daht der B'naere
0,9546 "vnser eintweders swere
0,9547 Mvoz iezvo ein ende han"
0,9548 do lief er Pytrvngen an
0,9549 vnd slvoch im ein- so herten slachk
0,9550 daz im z hovp vnz ovf den nachk
0,9551 allez ensamt enzwei gie
0,9552 do het mit grimme gerochen hie
0,9553 Her dietrich sinen lieben man
0,9554 her pitrvnch rvofen began
0,9555 "Swaz der minen hie mach wesen
0,9556 die vliehen ob si wellen genesen"
0,9557 daz was sin allerleste wart

0,9558 ovf den rekchen alphart
0,9559 viel er toter da nider
0,9560 daz gvlden rekchen sider
0,9561 Reicher von parise
0,9562 der stanche vnd der wise
0,9563 Braht chvrzlichen dar
0,9564 zwelf herliche schar
0,9565 In islicher schare breit
0,9566 riten tovsent rekchen gemeit
0,9567 Manige brvnne staelin
0,9568 die besten die do mohten sin
0,9569 da waren si gewapent in
0,9570 “ich sich wol wir chome- nimm’ hin”
0,9571 Sprach von Lvnders Helphrich .
0,9572 “edel chvnich von Romisch rich
0,9573 Wir svln z enowe lazen gan
0,9574 sit hie nieman genesen chan”
0,9575 “Daz ist mir ovch als maere”
0,9576 sprach der B’naere
0,9577 “ob ich hie gelige tot
0,9578 ich mvoz miner starchen not
0,9579 Hie an ein ende chomen
0,9580 od mir werd d’ lip benome-
0,9581 wir han noch rekchen wol gesvnt
0,9582 vnd han geiht an dirre stvnt
0,9583 waz wir livte mvgen han
0,9584 ich waen wol drizech tovsent man
0,9585 Hab wir noch vollichlichen”
0,9586 “nv laz wir dar strichen”
0,9587 Sprach dietleip von stieerlant
0,9588 da wart gewegen alzehant
0,9589 Sehs schar herliche
0,9590 dietleib der ellens riche
0,9591 was ir aller hovptman
0,9592 als ich fvr war v’nomen han .
0,9593 Si heten slehtes sich bewegen
0,9594 alle die Dietriches degen
0,9595 Leibes vnde gvotes
0,9596 si waren eines mvotes
0,9597 Daz erzeugten si des tages wol
0,9598 noch mer ich iv sagen sol
0,9599 die allertiweristen man
0,9600 die der von B’ne mohte han .
0,9601 Die wrden gewegen in den strit
0,9602 do was iz chom- an die zit
0,9603 Daz die veinde mit ir schar
0,9604 begvnden staphen daz ist war
0,9605 Gegen dem von Romisch lant

0,9606 do sprach her dietrich zehant
0,9607 “Nvtta rekchen hohgemvot”
0,9608 daz taten ovch die helde gvot
0,9609 von stat triben si div march .
0,9610 si chomen dar mit nide starch
0,9611 Ovf einander geriten
0,9612 da wart langer niht gebiten
0,9613 Sa zv den handen div swert
0,9614 da wart strites gegert
0,9615 Mit nidigem mvote
0,9616 die chvnen helde gvote
0,9617 Ovf einander slvogen
0,9618 mit grimme si trvogen
0,9619 Div swert in den handen
0,9620 mit chrefte si sich wanden
0,9621 Beidiv hin vnde her
0,9622 in was zvo einander ger
0,9623 da was iamer vnde we
0,9624 ez geschiht nimm’ me
0,9625 So herter strit an einer stat
0,9626 des werd Ermrichs nimm’ rat
0,9627 Der den strit ie gefvogte
0,9628 wand in nie genvogte
0,9629 Decheiner vntriwen
0,9630 des sol mich chleine riwen
0,9631 Swaz siner sele geschiht
0,9632 daz chlag ich nimm’ niht
0,9633 Si slvgen hin iene her
0,9634 also gie ez entwer
0,9635 Mit stvrm ovf der heide
0,9636 da geschach vil ze leide
0,9637 dem chvnige Ermriche
0,9638 ez wart ovch sich’liche
0,9639 Des von B’ne niht v’gescen
0,9640 vil manigen helt v’mezzen
0,9641 vlos da der B’naere
0,9642 ditz ist ein warez maere
0,9643 dirre stvrm der was groz
0,9644 daz blvot dvrch die ringe vloz
0,9645 vnd dvrch die ringe sere
0,9646 wa gehort ir ie mere
0,9647 Einen stvrm also langen
0,9648 ez was nv so ergangen
0,9649 Swaz da ze schaden moht ergan
0,9650 doch wart der strit also getan
0,9651 Er w’te dannoch al den tach
0,9652 o we waz livte da gelach
0,9653 e. daz ein ende naem der strit

0,9654 rehte wol ze none zit
0,9655 Do was velt vnde plan
0,9656 also iaem'lich getan
0,9657 Mit blvot vbervnnen
0,9658 die rekchen vil v'svnnen
0,9659 Heten nv vil chleine chraft
0,9660 div Ermriches ritterschaft
0,9661 Div was nv elliv erslagen
0,9662 ez ist ze maere wol ze sagen
0,9663 ditz wnder daz da geschach
0,9664 man sach von blvot manigen pach
0,9665 vber velt rinnen
0,9666 als ich mich chan v'sinnen
0,9667 So lach d' livte da so vil
0,9668 daz ich daz wol sprechen wil
0,9669 Daz bi niemens ziten
0,9670 in stvorm od in striten
0,9671 So manich man nie wart erslagen
0,9672 wer chvnd iz iv ze gelovbe sagen
0,9673 nv laze wir div maere stan
0,9674 vnd heben hie wider an
0,9675 wie sich ende der strit
0,9676 daz v'nemt an dirre zit
0,9677 Do Reicher von Parise
0,9678 der starche vnd der wise
0,9679 Mit dietlaiben hie gestreit
0,9680 Reicher het als man sait
0,9681 Mit im da zwelf tovsent man
0,9682 der chom nie chein' dan
0,9683 Od si laegen alle da tot
0,9684 da was ein chlaegelichir not
0,9685 daz da solich mort ergie
0,9686 ir hort iz gesagen nie
0,9687 Reht gegen abvnt
0,9688 do lagen tot vnde wnt
0,9689 alle Reicheres man .
0,9690 er chom ovch selb niht von dan
0,9691 In slvech wolfhart d' wigant
0,9692 ovch galt sich mit ellens hant
0,9693 Reicher der maere
0,9694 der slvoch dem B'naere
0,9695 aeht ze tode siner man
0,9696 die tivristen die er mohte han
0,9697 wer die waeren die wil ich
0,9698 iv nennen nv v'nemt mich
0,9699 Daz eine daz was helmschart
0,9700 daz ander was alphart
0,9701 daz drite her Nere

0,9702 si verchlagte nimm' mere
0,9703 von B'n der herre dietrich
0,9704 noch nenne ich iv sicherlich
0,9705 Einen rekchen ovzerchorn
0,9706 o we der ovch da wart v'lorn
0,9707 Daz was Ivbart von Latran
0,9708 vnd von Pole Berhtran
0,9709 Vnd ovch der chvne amelolt
0,9710 waer Romisch lant allez golt
0,9711 daz het der fvrste ovzerchorn
0,9712 drizech stvnt gerne vlorn
0,9713 Vnd het ez allez dar gegeben
0,9714 vmb siner lieben manne leben
0,9715 Da gelach her Ekkenot
0,9716 ekkewart starp da tot
0,9717 Da gelach Starcher d' degen
0,9718 der ahte rekche- vil bewegen .
0,9719 vergaz sit nimm' mere
0,9720 von Bern der here
0,9721 do der tach hine seich
0,9722 vnd div naht zvo steich
0,9723 do was ebene vnde tal
0,9724 allez vol vberal
0,9725 Getvnget mit toten vaste
0,9726 wol ein tevtshiv raste
0,9727 Ez mit toten vollez lach
0,9728 da was ein vrteillich' tach
0,9729 Da gelach manich breitiv schar
0,9730 Ermrich v'los alle die gar
0,9731 die er het braht in den strit
0,9732 ir lebt niemen bi der zit
0,9733 Niwan ainlef hvndert man
0,9734 vnd chomen die niht alle dan
0,9735 od ir wrd noch vil erslagen
0,9736 nv vernemt ich wil iv sagen
0,9736a auen-t wie Ermrich entran vnd der Bernaer nach ieit
0,9737 Do Ermrich daz gesach
0,9738 daz er ez het vast nach
0,9739 Do habt er bi Ribsteine
0,9740 dort verre ovf einem reine
0,9741 Da was ovch Sybech der vnstaete
0,9742 von dem die vngetriwen raete
0,9743 In die wertlt sint bechomen
0,9744 als ir dickch habt wol v'nomen
0,9745 do chom ovch witege gerant
0,9746 da er Ermrichen vant
0,9747 Vil balde er im zvo sprach
0,9748 als er in verrist an gesach

0,9749 “wes beit ir chvnich riche
 0,9750 daz ir niht sicherliche
 0,9751 vliehet zvo den vesten
 0,9752 seht ir dort her bresten
 0,9753 den h’ren dietrichen
 0,9754 wir svln im entwichen
 0,9755 Swaz wir nv lang’ hie bestan
 0,9756 daz mvoz vns an daz leben gan
 0,9757 Mag vnd livot sint alle erslagen
 0,9758 laz wir vns nv hie betagen
 0,9759 Des mveg wir chomen in groze not
 0,9760 waer vns’ ein her so waer wir tot”
 0,9761 In der zit do daz geschach
 0,9762 do chom gerennet dort h’ nach
 0,9763 Gvnther von Reine
 0,9764 vnd Gernot d’ brvd’ seine
 0,9765 Die hohsten fvrsten ovzerchorn
 0,9766 die heten an dem strite vlorn
 0,9767 Nivnzehen tovsent man .
 0,9768 vaste rvfen da began
 0,9769 der hohe chvnich Gernot
 0,9770 “swer hie niht welle ligen tot
 0,9771 Der heb sich von hinnen
 0,9772 ob er mveg entrinnen”
 0,9773 Da wart gebiten niht mer
 0,9774 Ermrich der chvnich her
 0,9775 Saz ovf ein gvot kastelan
 0,9776 vil vast man vliehen began
 0,9777 Sw’ baz moht d’ reit da hin
 0,9778 daz was ein wislicher sin
 0,9779 Niemen des and’n da erbeit
 0,9780 nv was ovch chvmen als ma- seit
 0,9781 der edele B’naere
 0,9782 mit manigem rekchen maere
 0,9783 vnd folgten im wol driv tovsent man
 0,9784 div ovze’welten kastelan
 0,9785 Traip man dar chreftichlichen
 0,9786 da ieit man Ermrichen
 0,9787 Gegen Bolonie zv der stat
 0,9788 wolfhart rvft vnde bat
 0,9789 Sinen lieben herren
 0,9790 “nv rechet ivren w’ren
 0,9791 vnd slahet swen ir vindet
 0,9792 niht nahen’ ir erwindet
 0,9793 vnd lat et einen hin niht”
 0,9794 o we der grozen geschiht
 0,9795 div an der slvht da geschach
 0,9796 man schoz slvoch vnde stach

0,9797 Die Ermriches ovf der straze
 0,9798 si stvrben ane maze
 0,9799 Der einlef hvndert manne
 0,9800 die mit im flvhen danne
 0,9801 der chom wan zwei hvndert hin
 0,9802 also nam zvo sin gewin
 0,9803 Mag vnde man er da v'los
 0,9804 o we wie schier er s v'chos
 0,9805 daz et er selbe da entran
 0,9806 er n rvcht vmbe mage vn- vmb man
 0,9807 Doch wil ich daz eine sagen
 0,9808 vnd wil iz imm' got chlagen
 0,9809 daz div stat so nahen was
 0,9810 da half leider daz er genas
 0,9811 dar in entran Ermrich
 0,9812 o we daz riwet mich
 0,9813 Sybch ovch mit im entran
 0,9814 nv horet waz ich v'nome- han
 0,9815 an dem graben vor d' stat
 0,9816 als man mir gesaget hat
 0,9817 Da erreit ekkehart Ribsteinen
 0,9818 "nv han ich der rechten einen"
 0,9819 Sprach der rekche ekhart
 0,9820 "nv wirstest dv lang' niht gespart
 0,9821 Dv vil vngetriwer man
 0,9822 dv gewinne mir mine h'ren an
 0,9823 die getriwen harlvngen
 0,9824 nv wil ich mit dir tvngen
 0,9825 Einen galgen ob ich mach
 0,9826 ez mvoz sin din lester tach
 0,9827 Sit mir dich got gefvget hat
 0,9828 decheinen vngetriwen rat
 0,9829 Getaetest dv nimm' mere
 0,9830 dv ernest daz vil sere
 0,9831 Het ich also waerliche
 0,9832 dinen herren Ermriche
 0,9833 alsan hie bi dir
 0,9834 so mvest er tot sin von mir"
 0,9835 do bot er im chrefigez golt
 0,9836 Ekkehart des niht en wolt
 0,9837 Er zvht daz swert mit ellens hant
 0,9838 ekhart der wigant
 0,9839 Rybstein daz hovpt ab slvoch
 0,9840 also toten er in trvoch
 0,9841 Vnd bant in ovf daz march
 0,9842 dan fvrt in d' helt starch
 0,9843 Gegen dem von B'ne wider
 0,9844 da sach er ovf der straz nider

0,9845 der toten harte vil ligen
0,9846 wie z Ermrich ist gedigen
0,9847 Daz habt ir allez wol v'nom-
0,9848 er hat den schaden da genom-
0,9849 Der im imm' nach gat
0,9850 do ekhart chom an die stat
0,9851 da der strit was ergan
0,9852 do chomen dietriches man
0,9853 Die da heten nach geieit
0,9854 welt ir nv horen herzen leit
0,9855 vnd starchen iam' manichvalt
0,9856 vmb alle die helde balt
0,9857 die an dem strit waren erslagen
0,9858 dar vmbe wart michel chlagen
0,9859 von allen Dietriches man
0,9860 ez mohte niemen v'lan
0,9861 Er mvste beweinen dise not
0,9862 ez lach da vil ir mage tot
0,9863 Do si ir herzenswaere
0,9864 chlagten mit dem maere
0,9865 do chom ovch her Dietrich
0,9866 vnd Rvdeger der loblich
0,9867 Nvdvnch vnde Baltram
0,9868 dietleib vnde Sintram
0,9869 Yrinch vnde Blodelin
0,9870 Walther vnde Erewin
0,9871 Hvnolt vnde Sigebant
0,9872 Berhther vnde Hildebrant
0,9873 Wolfhart vnde Starchan
0,9874 Friderich vnd Elsan
0,9875 Die chvnen rekchen maere
0,9876 mitsamt dem B'naere
0,9877 Stvden s nid' ovf daz gras
0,9878 vil barmchlich div chlage was
0,9879 Da was we vnd vngemach
0,9880 von B'ne d' vogt sprach
0,9881 Zv den rekchen vb'al
0,9882 "ir held nv get ovf daz wal
0,9883 vnd svchet ovz dem blvte
0,9884 die edelen rekchen gvte
0,9885 Tvot z iv selv ze heile
0,9886 lat s niht werden ze teile
0,9887 den bosen vnchvnder"
0,9888 si teilten sich besvnd'
0,9889 Ovff dem wale hin vnd her
0,9890 si plonten die toten da entw'
0,9891 Die Ermrichen horten an
0,9892 die wrden den vogelen da v'lan

0,9893 Swaz d' von hivnen da was
 0,9894 ovz dem blvotē man die las .
 0,9895 Vnd trvoch si ovz an daz lant
 0,9896 her dietrich alpharten vant
 0,9897 vnd den chvnen Ekewarten
 0,9898 amelolten vnd helmscharten
 0,9899 Vnd Ivbarten von Latran
 0,9900 do er sin getriwe man
 0,9901 Sach ligen in dem blvotē
 0,9902 mit grimmigem mvotē
 0,9903 Der von B'ne vb' si saz
 0,9904 nv mvgt ir horen g'ne daz
 0,9905 wie iaem'lich er chlagte
 0,9906 vor leide er reht v'zagte
 0,9907 Er vie sich selbe in daz har
 0,9908 er sprach "o we nv han ich gar
 0,9909 wne vnde vrevd v'lorn
 0,9910 sit min rekchen ovzerchorn
 0,9911 alle hie nv tot sint
 0,9912 ich armer dietmares chint
 0,9913 Nv mvz ich mit iam' leben
 0,9914 h're got dv hast mir gegeben
 0,9915 Niwan vngemach vnd h'zen leit
 0,9916 Maria mvt' vnde meit
 0,9917 Chvniginne in himelriche
 0,9918 erbarm dich genaedichliche
 0,9919 vber mich vrevdelosen man
 0,9920 o we waz ich nv v'lorn han
 0,9921 an dir getriwer alphart
 0,9922 ich was mit dir vil wol bewart
 0,9923 aller miner eren .
 0,9924 swar ich hin wolde chere
 0,9925 der triwe mvoz ich nv ane sin
 0,9926 o we des werden leibes din
 0,9927 Der nv die erde bowen sol
 0,9928 nv wirt mir ni-m' mere wol
 0,9929 vnz an mine leste stvnt"
 0,9930 alpharten chvst er an den mvnt
 0,9931 "o we hohgetriwer lip
 0,9932 dine tvgende mvzen elliv wip
 0,9933 Immer weinen vnde chlagen
 0,9934 swa si horten von dir sagen
 0,9935 O we ovzerwelter degen
 0,9936 amelolt rekche ovzerwegen
 0,9937 Nv mvoz ich mich ovch anen din
 0,9938 daz ich ane dich mvoz imm' sin
 0,9939 daz erbarm dir heilig' christ
 0,9940 waz grozer triwen an dir ist

0,9941 vil lieber amelolt gelegen
0,9942 o we vnv'zagter degen
0,9943 Sol ich dich nimm' gesehen
0,9944 mir ist an dir so leit geschehen
0,9945 Daz nie mennisch so leit geschach ."
0,9946 daz har er ovz dem chophe brach
0,9947 "o we ich vil vnsaelich man
0,9948 daz ich niht ersterben chan
0,9949 Z wiv bin ich imm' mere
0,9950 vil lieber rekche Nere
0,9951 wie moeht ich dich ovch v'chlagn
0,9952 o we daz ich niht bin erslagen
0,9953 des sei v'teilet div stvnt
0,9954 Nere swem din tvgent w' chvnt
0,9955 als reht sam si mir ist
0,9956 der chlagt dich fvr dise vrist
0,9957 Mit triwen imm' mere
0,9958 o we getriwer Nere
0,9959 dv waere chvne vnde milt
0,9960 nie nihtes dich bevilt
0,9961 Daz tvgende vnde ere heizen sol
0,9962 des was din reinez h'ze vol
0,9963 O we Ivbart von Latran
0,9964 waz ich an dir verlorn han
0,9965 wie sol ich nv an dich geleben
0,9966 got h're dv hast mir geben
0,9967 Groz vngenade bi minen tagen
0,9968 nie chein mennisch wart getragen
0,9969 So reht vnsaelich als ich bin
0,9970 swa ich mich verwende hin
0,9971 da ist mir wirser danne we
0,9972 ich v'chlage dich nimm' me
0,9973 Dv waere chvne vnde starch
0,9974 dar zv witzich vnde charch
0,9975 Getriv vnd vil tvgenthaft
0,9976 ovzgenomeniv ritterschaft
0,9977 die chvnde tvon din rein' lip
0,9978 alle magt vnde wip
0,9979 Svlen dinen tot wol chlagen
0,9980 ez gehort niemen von dir sagn
0,9981 vntat noch vntvgende
0,9982 dv waer in din' ivgende
0,9983 der triwen reht ein rose
0,9984 din werdez wip Binose
0,9985 Mach dich wol weinen vnde chlag
0,9986 min hvndert mohten niht gesagn
0,9987 die ere div an dir lach
0,9988 dv waer blveder ostertach

0,9989 Dine' livte vnd din' mage
0,9990 der milt ein gelichiv wage
0,9991 Ein hagel vnd ein bitter dorn
0,9992 hoher rekche ovzerchorn
0,9993 dinen veinden ze allen ziten
0,9994 da heime vnd in striten
0,9995 ovf velde vnd ovf straze
0,9996 o we wie ich dich laze
0,9997 Sol ich dich nimm' mer gesehen
0,9998 nv ist mir erste leit geschehen"
0,9999 hie mit chomen ovch gegang
0,10000 beidiv vrevnd vnde man
0,10001 Von den ein chlag sich da hvop
0,10002 da man die toten begrovop
0,10003 Si wunden die hende
0,10004 vnd chlagten manigen ende
0,10005 So grifen sich die in daz har
0,10006 so lagen dise fvr tote gar
0,10007 Iene sich ze dem herzen slvgen
0,10008 da si s ze dem grabe trvogen
0,10009 der den vater so der daz chint
0,10010 si waren reht von weinen blint
0,10011 So chleit der svs so chleit der so
0,10012 ez waren alle die vnvro
0,10013 Die dannoch lebten da gesvnt
0,10014 do man het bi der stvnt
0,10015 Die toten alle begraben
0,10016 sich chvnde nie wol gehabt
0,10017 der chvnich von Romisch riche
0,10018 chlagt so iamerliche
0,10019 Mit maniger vngehabe groz
0,10020 vnz daz sin wolfhart v'droz
0,10021 Er sprach "chvnich von Romisch lant
0,10022 ir welt vns allen sant
0,10023 In grozen iamer bringen
0,10024 vrevt evch des gedingen
0,10025 Edeler chvnich ovzerchorn
0,10026 habt ir die alten verlorn
0,10027 So habent si doch lazen chint
0,10028 die nach in gewachsen sint
0,10029 Ze mannen vollichlichen
0,10030 die dir ovf Ermrichen
0,10031 helfent imm' mere
0,10032 vnd rechen chvnich here
0,10033 Ir vaeter die hie sint erslagen
0,10034 la din vmmezlichez chlagen
0,10035 vnd gedench ovch dar an
0,10036 daz si niem- lebentich machen chan

0,10037 ane got aleine
0,10038 iesvs der vil reine
0,10039 den bitte vmb so lange vrist
0,10040 der aller dinge schephaer ist
0,10041 Daz er dir wende dinev leit
0,10042 vnd daz dv diner arbeit
0,10043 Ze ende chomest an Ermriche
0,10044 daz rat ich sicherliche”
0,10045 her Dietrich tet des man in bat
0,10046 er begie ein tvgent an d’ stat
0,10047 Daz vil selten dehein chvnich ie
0,10048 solhe tvgende begie
0,10049 hie bevor bi ir tagen
0,10050 er hiez ovz dem blvotē tragen
0,10051 Vil nach die besten alle
0,10052 swie si im waren ein galle
0,10053 Gewesen die Ermriches man
0,10054 vnd swie leit si im heten getan
0,10059 Der getriwe Dietrich
0,10060 der bestatet si vil tvgentlich
0,10061 nv svl wir z lazen ende han
0,10062 do man mage vnde man
0,10063 Die chvnen vnd die werden
0,10064 bestatet zv der erden
0,10065 Owe do rovmt iamerlich
0,10066 daz wal der h’re dietrich
0,10067 Si riten daz ende nider
0,10068 die rehten straze hin wider
0,10069 Gegen der stat ze Meilan
0,10070 als ich fvr war v’nomem han
0,10071 Do si waren bechomen dar
0,10072 do bat her Dietrich fvr war
0,10073 Rvdegeren den gvoten
0,10074 den reinen wol gemvoten
0,10075 vnd ovch alle Ezeles man
0,10076 dvrch sinen willē da bestan
0,10077 Daz si rvowe phlaegen
0,10078 vnd in gemache laegen
0,10079 vnz in div mvde entwiche
0,10080 vnd ovch daz man gestriche
0,10081 Von der mvde div march
0,10082 des gew’ten in die rekchen starch
0,10083 Ir wart mit vlize wol gepphlegen
0,10084 da rvobten die mvden degen
0,10085 vnz an den ahzehenden tach
0,10086 wes her dietrich do phlach
0,10087 Daz wil ich ivch wizen lan
0,10088 er besatzte B’n vnd Meilan

0,10089 Mvntigel vnd ovch Garte
0,10090 do beweint er alpharte
0,10091 Vnd den getriwen amelolt
0,10092 er wesse daz wol si warn im holt
0,10093 Nv habt ir selb wol v'nomen
0,10094 wie ez allez ist nv chomen
0,10095 Vmbe den B'naere
0,10096 wie er alle sine swaere
0,10097 an Ermrich gerach
0,10098 waz wnd's dar vmb geschach
0,10099 waz livte dar vmbe wart erslagen
0,10100 als ir . e . habt wol gehort sagen
0,10101 nv wil ich ivch wizen lan
0,10102 wie ez beginnet ende han
0,10103 Ditze bvoch von B'ne
0,10104 ob ir z welt horen g'ne
0,10105 Her dietrich hat gesiget
0,10106 Ermrich vnder geliget
0,10107 als daz was vil pillich
0,10108 do der herre dietrich
0,10109 Sin leit ein wenich gerach
0,10110 waz im schaden drvmb geschach
0,10111 daz svl wir da nv lazen stan
0,10112 Bern vnde Meilan
0,10113 Besatzt her Dietrich zehant
0,10114 vnd rovmt da mit Romisch lant
0,10115 Gegen den hivnen fvr er
0,10116 vnd der Marcgrave Rvdeg'
0,10117 Do bevalch er Garte
0,10118 dem chvnen ekewarte
0,10119 nv hat ein ende daz maere
0,10120 hin fvr der B'naere
0,10121 zv den hivnen in daz lant
0,10122 boten gahten al zehant
0,10123 Hin z Ezelvrch daz ist war
0,10124 si seiten Ezelen gar
0,10125 Lieb vnd leidiv maere
0,10126 wie ez ergangen waere
0,10127 Beidiv ze schaden vnd ze frvm
0,10128 nv ist iz chomen an daz drvm
0,10129 des bvoches von B'ne
0,10130 Ezel sach harte g'ne
0,10131 Daz der Bernaere
0,10132 an dem sige waere
0,10133 In der zit do daz geschach
0,10134 hie mit man ovch chome- sach
0,10135 den herren Dietriche
0,10136 Ezel der vil riche

0,10137 hie mitsamt vrovn Helchen gie
0,10138 da er die herren wol enphie
0,10139 Ezel den von B'ne
0,10140 sach da herte g'ne
0,10141 Da wart vragē niht v'lan
0,10142 wie ez vmbe den strit was ergan
0,10143 Daz sagt do her dietrich
0,10144 er bat die chvneginne rich
0,10145 Sine liebe rekchen chlagen
0,10146 vnd alle die da warn erslagen
0,10147 daz beweint si vil sere
0,10148 waz tovch der rede mere
0,10149 Si chlagten in ir mvote
0,10150 die edelen rekchen gvote
0,10151 Vnd swer ovf dem wal da v'schiet
0,10152 hie mit endet sich daz liet